



ILIDŽA

INFORMATIVNI BILTEN
OPĆINE ILIDŽA

BROJ 200




SADRŽAJ

Drugo izdanje humanitarne trke Stojčevac 5K Cjelodnevna zabavno-sportska manifestacija	8
Svečani prijem za ilidžanske prvaciće Program za nove školarce na obnovljenom Centralnom trgu	10
Nakon duge pauze održane konjičke trke Međunarodno takmičenje na hipodromu Butmir	13
Premijera filma "Čarli - Preko granica hrabrosti" Povodom 30. godišnjice pogibije Emira Bogunića "Čarlja"	18
Pokazna vježba struktura CZ Općine Ilidža Kroz simulaciju testirana spremnost i koordinacija	20
Otvoren drugi Centar za zdravo starenje Prostor namijenjen građanima treće životne dobi	21
Stojčevac dobio spomen-obilježje za 67 šehida Obilježena 31. godišnjica Bitke za Stojčevac	22
Općina Ilidža rekorder po iznosu stipendija Odlučeno na 23. redovnoj sjednici Općinskog vijeća	23
Ilidžanski festival opravdao očekivanja Ljetna pozornica bila je ispunjena obje festivalske večeri	24
Na Ilidži otvoren novi proizvodni pogon Načelnik Nermin Muzur presjekao vrpcu	30
Značajno unaprijeđena saobraćajna infrastruktura Kroz više od 80 uspješno realizovanih projekata	31
Zgrade u centru Ilidže dobile nove krovove Kroz projekt nužnih opravki	32
Tramvajska pruga Ilidža - Hrasnica više nije san U upotrebi nova baza podataka za K.O. Vlakovo	35



IMPRESSUM

Izdavač: **Općina Ilidža**
Butmirska cesta 12
71210 Ilidža
info.desk@opcinailidza.ba
+38733775600

 www.opcinailidza.ba

Pripremili: **Dino Stambolić**
Medina Aganspahić
(lice na stručnom osposobljavanju)

DTP: **Dino Stambolić**

FOTO: **Dino Stambolić**
Damir Atić (lice na stručnom osposobljavanju)

Štampa:
Svetlost BH Print

Tiraž: **3.000**





RIJEČ NAČELNIKA

Ponosan sam što vam u jubilarnom 200. broju Informativnog biltena Općine Ilidža možemo predstaviti realizovane kapitalne projekte koji su definitivno promijenili izgled naše lokalne zajednice i oplemenili je sadržajima kakvi su joj nedostajali.

Zahvaljujući pravovremenom planiranju infrastrukturnih ulaganja za ovu godinu kao i osiguravanju budžetskih sredstava, završena je izgradnja Sportsko-rekreativnog centra Čarli, koji je sasvim sigurno jedan od najljepših i najboljih objekata te vrste u našoj državi. Najbolji sud o svrsishodnosti ovog Centra dali su oni zbog kojih je napravljen, djeca! Sretni smo što je tokom ljetnih dana "Čarli" bio ispunjen djecom i omladinom koja su mogla uživati u sadržajima kakvih ranije, nažalost, nije bilo na našoj Ilidži.

Samom centru Ilidže ovog smo ljeta vratili sjaj kakav zaslužuje. Obnovljeni Centralni trg između Prve osnovne škole i Četvrtne gimnazije već je u zaborav poslao ružnu sliku po kojoj je posljednjih desetak godina strogi centar naše lokalne zajednice bio prepoznat. Ogroman trg otvoren je fantastičnim koncertom Dženana Lončarevića, a ugostio je i manifestaciju Dani bajramske radosti, kao i svečani prijem koji smo organizovali za sve ilidžanske prvačice.

U nizu važnih realizovanih projekata je i revitalizacija Velikog parka, kojem je vraćen stari izgled, a Ilidža i Kanton Sarajevo dobili su jednu od najvećih uređenih parkovskih površina na površini od skoro 50.000 metara kvadratnih. Ovim parkom Ilidža je dobila još jedan atraktivan turistički sadržaj, što ide u prilog podatku da je do kraja oktobra 2023. godine Ilidžu posjetilo 242.619 turista, a ostvareno je 562.559 noćenja.

Na Ilidžu se ovog ljeta "vratilo" Ilidžanski festival, najstariji festival narodne muzike na prostorima bivše Jugoslavije, a velike zvijezde narodne muzike, koje su bili gosti festivala, iskazali su posebnu emociju prema Ilidži i Ilidžanskom festivalu.

Kao važan dio tradicije ilidžanskih prostora na hipodromu Butmir ovog ljeta održale su se konjičke trke, a nakon višedecenijskih priča o tramvajskoj pruzi Ilidža - Hrasnica, konačno je počela realizacija jednog od najvećih kapitalnih projekata u historiji Općine Ilidža i Kantona Sarajevo.

Općina Ilidža nastavila je s realizacijom važnih projekata, od kojih će građani imati višestruku korist. Obnova premjera aviosnimanjem, koju sprovodimo kao prva općina u Federaciji Bosne i Hercegovine nakon agresije, daje prve rezultate, a u upotrebi su već podaci koji su dobiveni za katastarsku općinu Vlako. U podmakloj fazi realizacije su još četiri katastarske općine, snimanje katastarskih općina Osjek i Blažuj već je izvršeno, a potom slijede katastarske općine Butmir i Hrasnica.

Nastavljamo i sa ulaganjima u infrastrukturu kako bismo poboljšali kvalitet života naših građana. Mnogo pažnje smo posvetili i

izgradnji vodovodne i kanalizacione mreže. Završena je prva faza radova na kolektoru za Rakovicu, u posljednjoj fazi je izgradnja pumpne stanice u Blažuju, a obnavlja se i gradi kanalizaciona mreža u naseljima Butmir i Osjek, dok se u Sokolović Koloniji, Osjeku i Hrasnici obnavlja vodovodna mreža.

Izuzetno nam je važno, a znajući kakvu su štetu pretrpjeli naši građani u poplavama 2021. godine, da smo uz podršku Vlade Kantona Sarajevo i u saradnji s Agencijom za vodno područje rijeke Save uspješno završili prvu fazu regulacije korita rijeke Željeznice u naselju Otes. Mnogo pažnje posvetili smo čišćenju i održavanju svih vodotoka na području općine Ilidža.

Kroz aktivnu saradnju s Ministarstvom saobraćaja Kantona Sarajevo radimo na ključnoj traci na brzooj cesti Ilidža - Blažuj, kao i na izgradnji ratnog puta preko planine Igman.

I ove godine nastavili smo s projektima obnove krovova i utopljanja zgrada, a kroz koji su u protekle tri godine sanirana 22 objekta kolektivnog stanovanja.

Pored konstantnog ulaganja u infrastrukturne projekte Općina Ilidža je mnogo pažnje posvetila mladima kroz različite programe podrške. Dajemo šansu mladima, uz to smo općina sa najvećim stipendijama za studente i učenike. Izdvajamo i sredstva za poticaj zapošljavanja mladih, motivišemo mlade na razmišljanje i ohrabrujemo ih na pokretanje vlastitih biznisa.

Da brinemo o svim kategorijama stanovništva i da su nam svi jednako bitni možda ponajbolje potvrđuje otvaranje drugog Centra za zdravo starenje na području općine Ilidža u naselju Lužani, kao i pažnja koju smo posvetili našim prvačicama povodom prvog dana škole.

Obnova starih i zapuštenih, kao i izgradnja novih sadržaja od kojih će ponajviše koristiti imati djeca i mladi, nešto je čemu poklanjamo mnogo pažnje. Zbog toga smo već krenuli s izgradnjom modernog zabavnog parka u Mjesnoj zajednici Butmir, za koji su najmlađi stanovnici ovog naselja bili uskraćeni. Vjerujem da ćemo s tom praksom u budućnosti nastaviti i u ostalim mjesnim zajednicama naše općine.

S projektima i radovima nastavljamo. Najveći kapitalni projekti u ovoj kalendarskoj godini svakako će biti izgradnja osnovne škole na Stupu, izgradnja sportske dvorane u Hrasnici, kao i rekonstrukcija vrtića Lužani.

Vas samo molimo da čuvate ono što smo zajedno napravili.



Uspješno realizovan jedan od najavljenih kapitalnih projekata Općine Ilidža

SPORTSKO-REKREATIVNI CENTAR "ČARLI" EMIR BOGUNIĆ SVEČANO OTVOREN



Centar smješten na oko 15.000 metara kvadratnih nudi različite sadržaje za sport i rekreaciju

Kamen-ploču ČARLI Emir Bogunić, po kojem je centar dobio ime otkrili su načelnik Općine Ilidža Nermin Muzur i Adisa Bogunić, kćerka rahmetli Emira Bogunića - Čarlija

Sportsko-rekreativni centar "Čarli" Emir Bogunić, smješten na obali rijeke Željeznice u neposrednoj blizini Mosta Alije Izetbegovića, svečano je otvoren 21. juna 2023. godine.

Centar smješten na oko 15.000 metara kvadratnih nudi različite sadržaje za sport i rekreaciju. Pored terena za rukomet, košarku, mali fudbal i odbojku na pijesku, "Čarli" posjeduje i stazu za trčanje, kao i brojne fitness sprave, a tu su i tri igrališta sa mobilijarom prilagođena najmlađima te igralište za djecu sa poteškoćama u razvoju.

Sadržaj kakav je nedostajao Ilidži, svečano su otvorili načelnik Općine Ilidža Nermin Muzur i direktor Javnog preduzeća Ilidža Jasmin Viteškić.

- Sretan sam jer smo uspjeli da najmlađim stanovnicima općine Ilidža ponuditi nešto što dosad nisu imali. Vjerujem da će ovaj park biti prepun razigrane dječice, ali i mladih koji će svoje slobodno vrijeme nastojati adekvatno iskoristiti. Potrudili smo se da sadržaj parka bude raznovrstan i da najmlađe generacije svoje vrijeme provode u igri, ali i da ostali građani uživaju u svemu ovome što ovaj park nudi - istakao je načelnik Općine Ilidža, Nermin Muzur.

Kamen-ploču ČARLI Emir Bogunić, po kojem je Centar dobio ime otkrili su načelnik Muzur i kćerka rahmetli Emira Bogunića - Čarlija, Adisa Bogunić.



Košarkaški Zmaj, Amar Gegić, prisustvovao otvorenju

Emir Bogunić - Čarli bio je komandir voda Četvrte motorizovane brigade i jedan od njenih najistaknutijih boraca. Najvišim ratnim priznanjem "Zlatni ljiljan" odlikovan je 1993. godine, a posthumno je 1994. godine odlikovan "Ordenom za vojne zasluge sa zlatnim mačevima" i proizveden u čin pukovnika Armije Republike Bosne i Hercegovine. Poginuo je 28. jula 1993. godine na Golom brdu na Igmanu. Tokom agresije bio je sinonim za sport na slobodnoj teritoriji općine Ilidže, s obzirom na to da su svi sportski kolektivi nosili njegov nadimak.

Svečanom otvorenju SRC "Čarli" Emir Bogunić prisustvovao je i veliki broj djece, građana, kao i članovi omladinskih selekcija ilidžanskih sportskih klubova, ali i drugih udruženja. Otvorenju i druženju sa najmlađima prisustvovao je i Amar Gegić, Ilidžanac, košarkaški reprezentativac Bosne i Hercegovine.

FOTOGALERIJA



Svečanom priredbom, uz pjesme i prigodne recitacije



Načelnik Muzur im uručio diplome

VRTIĆ LUŽANI ISPRATIO NOVU GENERACIJU DJECE PREDŠKOLSKOG UZRASTA

Svečanom priredbom, uz pjesme i prigodne recitacije, jedna generacija djece predškolskog uzrasta u vrtiću Lužani oprostila se od vrtićkih dana. U prisustvu roditelja, teta i odgajateljica mališani su ispraćeni na jedan novi put, put kojim smo svi prošli.

Priredbi u dvorištu vrtića Lužani prisustvovao je i načelnik Općine Ilidža Nermin Muzur, kao i dopredsjedavajući Općinskog vijeća Ilidža Selver Zečirović i Amar Bungur.

- Sticanje obrazovanja, usvajanje znanja i vještina samo su etape na cjeloživotnom putu edukacije. Našoj dragoj djeci i njihovim roditeljima želim da to putovanje bude što ugodnije - poručio je načelnik Muzur, koji je na kraju svečane priredbe uručio diplome budućim đacima prvacima.

Projekt koji je podržala Općina Ilidža



Publika velikim aplauzom nagradila sve učesnike koncerta

Prvi od dva koncerta, koji su predviđeni kroz projekt "Raspjevana Ilidža", učenici Osnovne muzičke škole Ilidža održali su u sali Multimedijalnog centra Kina Igman.

Učenici Osnovne muzičke škole Ilidža i njihovi nastavnici posjetiocima su se predstavili sa zanimljivim muzičkim numerama, a dugotrajan aplauz na kraju koncerta najbolje je opisao zadovoljstvo publike u prepunoj sali.

Drugi koncert projekta "Raspjevana Ilidža" održan je na Ljetnoj pozornici, a za njega je također vladao veliki interes. Iz Osnovne muzičke škole Ilidža zahvalili su se Općini Ilidža, načelniku Nerminu Muzuru, kao i Kulturno-sportskom i rekreacionom centru Ilidža i direktoru Harisu Topaloviću.



Ilidžanski osnovci nastavili njegovati kulturu sjećanja na žrtve genocida u Srebrenici

MEMORIJALNI CENTAR SREBRENICA - POTOČARI POSJETILO 750 UČENIKA 12 ILIDŽANSKIH ŠKOLA



Četrnaesta posjeta ilidžanskih osnovaca Srebrenici

Učenice i učenici osmih razreda 12 osnovnih škola s područja općine Ilidža 25. aprila boravili su u jednodnevnoj posjeti Memorijalnom centru Srebrenica - Potočari.

Više od 750 ilidžanskih osnovaca, u pratnji 50 nastavnika, odalo

je počast žrtvama genocida.

Učenici osnovnih škola s područja Ilidže od 2008. godine u organizaciji Općine Ilidža redovno posjećuju Memorijalni centar Srebrenica - Potočari, a posljednja posjeta Potočarima i Srebrenici bila je ukupno 14. koja je realizovana.

Izuzetak je napravljen 2020. i 2021. godina, kada posjeta Memorijalnom centru nije bila moguća zbog pandemije koronavirusa.

Kroz ovaj humani i edukativni projekt koji organizuje i finansira Općina Ilidža, prema procjenama, Memorijalni centar Srebrenica - Potočari do ove godine posjetilo je više od 10.000 ilidžanskih osnovaca, čime zorno potvrđujemo opredjeljenje da se održi kultura sjećanja na žrtve genocida iz 1995. godine.

Ovogodišnja posjeta Srebrenici realizovana je uz pomoć Federalne uprave policije, Doma zdravlja Kantona Sarajevo - OJ Ilidža i Gorske službe spašavanja Ilidža.

Na 22. redovnoj sjednici Općinskog vijeća Ilidža izabran novi zamjenik predsjedavajućeg

AMAR BUNGUR UMJESTO REDŽE LEMEZANA

Redovna sjednica Općinskog vijeća Ilidža, 22. po redu, počela je polaganjem zakletvi Azre Jahić i Anele Kapidžić, čime su preuzele mandat novih vijećnika, dok je Amar Bungur većinom glasova izabran za zamjenika predsjedavajućeg Općinskog vijeća, budući da je Redžo Lemezan preuzeo mandat u Skupštini Kantona Sarajevo.

Na sjednici je usvojena Odluka o izvršenju Budžeta Općine Ilidža za period 1. 1. - 31. 3. 2023. godine, kao i finansijski izvještaj za isti period.

Usvojena je Odluka o dopuni Odluke o dodjeli stipendija talentovanim učenicima i studentima u školskoj/akademskoj 2022/2023. godini.

Vijećnicama je kao informativni materijal dostavljen finansijski



Amar Bungur (prvi s desna)

izvještaj boračkih udruženja o utrošku dodijeljenih sredstava za programske i projektne aktivnosti za 2022. godinu, kao i informacija o stanju bespravne gradnje na području Ilidže.

Načelnik Općine Ilidža Nermin Muzur ugostio premijera Federacije Bosne i Hercegovine

NERMIN NIKŠIĆ U POSJETI OPĆINI ILIDŽA



Saša Magazinović, Nermin Nikšić i Adnan Šteta

Načelnik Općine Ilidža Nermin Muzur ugostio je premijera Federacije Bosne i Hercegovine Nermina Nikšića, zajedno sa zastupnikom u Parlamentu BiH, Sašom Magazinovićem i ministrom saobraćaja Kantona Sarajevo Adnanom Šetom.

Na temelju konstruktivnog razgovora premijeru Nikšiću prezentovane su dosadašnje aktivnosti i realizovani projekti na području općine Ilidža, kao i strateško opredjeljenje Općine u narednom periodu.

- Za realizaciju planiranih projekata potrebna je podrška viših nivoa vlasti. Izuzetno mi je drago što je premijer Nikšić izrazio spremnost na pružanje podrške i doprinos Vlade Federacije Bosne i Hercegovine za njihovu provedbu - istakao je načelnik Općine Ilidža, Nermin Muzur.



Radovi na poboljšanju sportske infrastrukture

ZASJALI REFLEKTORI NA POMOĆNOM TERENU STADIONA U HRASNICI



Posve novi izgled pomoćnog terena

Postavljanjem stubova za reflektore i rasvjetnih tijela pomoćni teren stadiona u Hrasnici na pravom je putu da postane jedan od najboljih i najljepših terena s umjetnom podlogom u BiH.

Nakon što je ranije instalirana izuzetno kvalitetna umjetna trava, a potom ograda i zaštitne mreže iza golova, svi korisnici ovog terena uskoro će moći uživati i u noćnim terminima.

Općina Ilidža na ovaj način nastavlja s projektima razvoja i izgradnje sportske infrastrukture u našoj lokalnoj zajednici.

- Šljaka na pomoćnom terenu stadiona u Hrasnici odavno je stanovnik zaborava, a pred novim mladim generacijama su treninzi i utakmice u noćnim terminima. Nastavljamo graditi i razvijati Ilidžu, dom dobrih ljudi - poručio je načelnik Općine Ilidža, Nermin Muzur.

Rekonstrukcija pomoćnog terena stadiona u Hrasnici jedan je od koraka ka potpunoj obnovi Sportskog centra Hrasnica, a nova sportska dvorana upotpunit će njegov novi izgled.

Načelnik Muzur i premijer Uk održali sastanak



Početak nečega što će biti praksa i u budućnosti

OPĆINA DOMAĆIN SJEDNICI VLADE KANTONA SARAJEVO

Općina Ilidža je 15. juna 2023. godine bila domaćin sjednici Vlade Kantona Sarajevo.

Nakon sastanka s načelnikom Nerminom Muzurom i po završetku sjednice premijer Vlade KS, Nihad Uk, naglasio je kako je ovo početak nečega što će biti praksa i u budućnosti, a na sastanku se razgovaralo i o projektima koji će u narednom periodu biti realizirani na području naše općine.

- Kroz ugodan razgovor načelnik Muzur mi je prezentirao dio aktivnosti u Općini. Zadovoljstvo je čuti da se radi na izgradnji škole, dvije sportske dvorane, niza dječijih igrališta, trga i tako dalje. Vlada će i dalje biti partner uspješnih priča - rekao je premijer KS, Nihad Uk, te se zahvalio na gostoprimstvu.

Općina Ilidža je u proteklom periodu imala odličnu saradnju s Vladom KS, što potvrđuju i riječi načelnika Nermina Muzura.

- Podržavamo unaprjeđenje saradnje između Vlade KS i lokalnih zajednica. Drago nam je da smo prva općina koja je ugostila sjednicu Vlade. U mandatu prethodne Vlade uspjeli smo pokrenuti važne zajedničke projekte na području naše općine, a iskreno se nadam da ćemo i s aktuelnim sazivom Vlade imati dobru i kvalitetnu saradnju, te da će od nje na kraju najviše koristiti imati naši građani.

Usponom na 8.848 metara postao tek četvrti bh. alpinist koji se ispeo na najviši vrh na zemaljskoj kugli

NAKON USPONA NA MT. EVEREST NAČELNIK MUZUR UGOSTIO TOMISLAVA CVITANUŠIĆA



Načelnik Muzur i Tomislav Cvitanušić

Uspješni bosanskohercegovački triatlonac i alpinista Tomislav Cvitanušić posjetio je Općinu Ilidža i načelnika Nermina Muzura

samo nekoliko dana nakon što se vratio iz Nepala i uspona na najviši vrh svijeta - Mt. Everest.

Usponom na 8.848 metara Cvitanušić je postao tek četvrti bosanskohercegovački alpinist koji je dosegao ovu magičnu brojku u svijetu alpinizma.

Uprkos brojnim obavezama Tomislav je našao vremena i počastio nas svojom posjetom, kao i svime što je iskusio tokom ekspedicije koja je trajala više od 50 dana.

Načelnik Općine Ilidža čestitao je Ironmanu, koji je inače nastanjen na području naše lokalne zajednice, na vrhunskom postignuću, te mu zaželio mnogo sreće u narednim izazovima o kojima su razgovarali i ovom prilikom.

U cjelodnevnom zabavno-sportskom programu na poznatom ilidžanskom izletištu uživale sve generacije



DRUGO IZDANJE HUMANITARNE TRKE STOJČEVAC 5K OPRAVDALO OČEKIVANJA

Trku čiji je tehnički organizator bila JU KSiRC Ilidža, a koja je ove godine privukla više od 700 učesnika, najbrže su istrčali Alen Memić i Zaim Šuman (17:45), koji su zajedno prošli kroz cilj

Drugo izdanje humanitarne trke Stojčevac 5K, koja se u organizaciji Općine Ilidža održala na poznatom ilidžanskom izletištu, u potpunosti je opravdala očekivanja.

Cjelodnevni sportsko-zabavni program počeo je u 10 sati "Porodičnim danom" koji je obilovao brojnim sadržajima za najmlađe posjetioce Stojčevca. Pored brojnih sportskih poligona, djeca su bila u prilici pokazati umijeće iz likovnog, učestovati u mini-trci, naučiti pružanje prve pomoći, družiti se s izviđačima i maskotama, a mogli su i ukasiti svoje lice.

Sve ove aktivnosti bile su besplatne, kao i sladoled, a kompletan program "Porodičnog dana" trajao je sve do 15 sati, kada su počele i finalne pripreme za humanitarnu trku Stojčevac 5K.

Ovogodišnje izdanje brojem učesnika nadmašilo je trku koja je održana prošlog ljeta, a koja je po broju trkača bila rekordna u Bosni i Hercegovini.



Najmlađi posjetioci uživali u besplatnim sadržajima "Porodičnog dana"

Svi učesnici su, bez obzira na plasman, po završetku trke imali samo riječi hvala za sportsku manifestaciju koja se održava u jedinstvenom ambijentu Stojčevca i Velike aleje i već je zaradila posebno mjesto kod trkača u našoj zemlji. Za razliku od premijerne trke ove godine se trčalo certificiranom stazom.



Trku čiji je tehnički organizator bila JU KSiRC Ilidža, a koja je ove godine privukla više od 700 učesnika, s najbržim vremenom (17:45) istrčali su Alen Memić i Zaim Šuman, koji su zajedno prošli kroz cilj. U međusobnom dogovoru na najviše mjesto pobjedničkog postolja popeo se Memić. Treće mjesto pripalo je Ilhanu Lokvančiću s vremenom 18:12, a mladi fudbaler Famosa okitio se i titulom najbržeg Ilidžanca, koju je osvojio i prošle godine.

Titulu najbrže na Stojčevcu, osvojenu prošle godine, odbranila je Amela Trožić (19:42), dok je druga bila Iryna Aniechkina (23:28), koja je ujedno bila i najbrža Ilidžanka. Treća pozicija u ženskoj konkurenciji pripala je Marijeti Perić (24:03).



Ajša Mešanović (1956. godište) bila je najstarija učesnica, a najmlađi učesnik bio je Adin Mujezinović (2016. godište). Nagrade su dobili i Hana Lihovac (2014.) kao najmlađa djevojčica, ali i Mustafa Suljić (2014.) koji je bio najbrži u konkurenciji najmlađih učesnika.

Prijatelji humanitarne trke osigurali su vrijedne i zanimljive nagrade za sve, dok je kompletan iznos od uplaćenih startnina otišao humanitarnim udruženjima.

Vaučer u iznosu od 5.000 KM načelnik Općine Ilidža Nermin Muzur, koji je također bio među trkačima, uručio je Udruženju Srce za djecu oboljelu od raka. Vaučer od 3.000 KM pripao je



Najbrže u ženskoj konkurenciji

Udruženju penzionera Ilidža, dok će 2.000 KM biti uplaćeno na račun Udruženju oboljelih od celijakije No Gluten.

- Mislim da smo uspeli nadmašiti premijerno izdanje humanitarne trke Stojčevac 5K ali i ponuditi dodatni cjelodnevni sadržaj za sve generacije. Broj trkača kao i broj posjetilaca obavezuje nas da već naredne godine, ako Bog da, budemo još bolji, s još nekim novim sadržajima - rekao je načelnik Općine Ilidža Nermin Muzur, te dodao:



Iznos od uplaćenih startnina pripao humanitarnim udruženjima

- Vjerujem da ćemo ići u pravcu da pored 5K trke imamo i 10K trku, a ni trail trku od Stojčevca do Hrasničkog stana ne bi trebalo isključiti iz potencijalnih noviteta za 2024. godinu. Posebno mi je drago da je "Porodični dan" okupio veliki broj djece i njihovih roditelja, te da su mogli besplatno uživati u svim sadržajima.

Na kraju, načelnik je naglasio, kako će trka i u budućnosti biti humanitarnog karaktera, a cjelodnevni sadržaji planirani su i za naredno ljeto.

Svi posjetioci Stojčevca nakon trke mogli su uživati u muzičkom programu, dok se na velikom videozidu pratila utakmica Portugal - Bosna i Hercegovina. Nažalost poraz Zmajeva je narušio sjajnu atmosferu koja je vladala na poznatom izletištu podno Igmana o kojem brine KJU za zaštićena prirodna područja Sarajeva.

FOTOGALERIJA





Općina Ilidža na Centralnom trgu priredila poseban zabavni program za nove školarce



750 prvaka svih ilidžanskih osnovnih škola

FOTO: Oslobođenje

Općina Ilidža odlučila je prvi dan škole svim ilidžanskim prvacićima učiniti posebno zanimljivim i interesantnim, a sve kako bi s Centralnog trga ponijeli lijepa sjećanja na jedno novo životno iskustvo prožeto ljubavlju prema domovini.

Zabavni program, prožet i inspirisan patriotskim notama, imao je zadatak da novi đaci prvaci početak jedne nove živote epohe shvate kao jednu stepenicu u svom razvoju, odrastanju i obrazovanju.

Početni taktovi himne Bosne i Hercegovine bili su znak za svih 750 prvacića da kartone dignu visoko ka nebu kako bi na taj način odali počast himni ali i "nacrtali" zastavu naše domovine.

Ljubav i emocija prema domovini posebni su osjećaji koje je često teško, nekada i nemoguće, opisati. Upravo zbog toga, Općina Ilidža potrudila se da posebnim programom novim

školarcima na jedan posve neobičan način pokaže i prikaže važnost te vrste ljubavi koja će ih pratiti kroz obrazovanje ali i kroz cijeli život.

Prijemu su prisustvovali direktorice i direktori osnovnih škola, kao i ministrica obrazovanja Kantona Sarajevo Naida Hota-Muminović, koja je istakla da se iz godine u godinu trude, zajedno sa direktoricama i direktorima osnovnih škola, da se đaci dočekaju u što ljepšem ambijentu.

Svečana ceremonija u kojoj su djecu zabavljali Elvir Hadžijamaković - Lilo i brojne maskote završena je pjesmom Alekse Šantića "Ostajte ovdje" u izvedbi hora Prve osnovne škole.

Općina Ilidža osigurala je i simbolične paketiće za nove školarce, a koji su im podijeljeni u njihovim školama.

Općina osigurala sredstva za nabavku ultrazvučnog aparata, kao i za rekonstrukciju odjela pedijatrije

NAČELNIK MUZUR I PREDSJEDAVALJUĆI STAMBOLIĆ POSJETILI DOM ZDRAVLJA ILIDŽA

Rad Doma zdravlja Ilidža, kvalitetna zdravstvena usluga i zaštita od velike je važnosti za stanovnike Ilidže. Zbog toga Općina Ilidža uvijek nastoji biti podrška u nabavci novih instrumenata, opreme, ali i u poboljšanju uslova za uposlenike i pacijente Doma zdravlja na Ilidži.

Nakon projekta utopljanja zgrade Doma zdravlja, koji je realizovan uz podršku Vlade KS, Općina Ilidža osigurala je sredstva za nabavku novog ultrazvučnog aparata, kao i za unutrašnju rekonstrukciju jednog dijela zgrade (odjel pedijatrije).

Načelnik Općine Ilidža Nermin Muzur i predsjedavajući OV Tarik Stambolić posjetili su DZ Ilidža, gdje su s generalnim direktorom JU Dom zdravlja KS Abelom Baltićem i šeficom OJ Doma zdravlja Ilidža Sedikom Kapetanović razgovarali o narednim koracima kako bi unaprijedili usluge za naše građane.



Općina uvijek nastoji biti podrška Domu zdravlja Ilidža

U saradnji s Agencijom za vodno područje rijeke Save i Vladom Kantona Sarajevo

UREĐEN DIO KORITA RIJEKE ŽELJEZNICE



"Slaba tačka" poplava iz novembra 2021.

Okončani su radovi na jednom od najvažnijih projekata za Općinu Ilidža, a koji se odnose na uređenje korita rijeke Željeznice u Mjesnoj zajednici Otes, u dijelu koji se pokazao kao slaba tačka u nezapamćenim poplavama koje su pogodile našu lokalnu zajednicu u novembru 2021. godine.

Strateški važna putna komunikacija za Ilidžu i Sarajevo



Prva dionica puta preko planine Igman

RATNI PUT DOBIO ASFALT U DUŽINI 1.200 METARA

Ratni put preko planine Igman, uz tunel DB, bio je žila kucavica za Sarajevo tokom agresije na Bosnu i Hercegovinu.

Ovaj izuzetno kompleksan i izazovan projekt, ali i strateški jako važan za Ilidžu i Kanton Sarajevo, dobio je novu dionicu asfalta u dužini 1.200 metara.

- Građani Ilidže i Sarajeva će zahvaljujući ovoj saobraćajnici u budućnosti kroz teritoriju FBiH moći doći do naših olimpijskih planina - naveo je Nermin Muzur, načelnik Općine Ilidža, jedan od razloga zbog kojih je ovaj projekt itekako bitan.

Radovi na rekonstrukciji ratnog puta preko Igmana, u dužini 2.964 metara, počeli su 26. maja 2022. godine, a Okvirni sporazum potpisan je na tri godine u vrijednosti 3.850.000 KM.

Ovaj dio puta dobit će i horizontalnu i vertikalnu signalizaciju, a nakon čega će uslijediti nastavak radova i na drugim dionicama.

- Ratni put simbol je otpora i spasa, i višestruko je značajan, kako zbog svoje historije, tako i zbog povezivanja tri općine našeg kantona - rekao je ministar saobraćaja Kantona Sarajevo Adnan Šteta, pohvalivši saradnju s Općinom Ilidža.

Načelnik Općine Ilidža Nermin Muzur iskazao je zadovoljstvo zbog činjenice da su radovi na prvom dijelu ovog izuzetno važnog projekta završeni bez većih problema.

- Odlučni smo da kroz saradnju s Agencijom za vodno područje rijeke Save i Vladom Kantona Sarajevo, a kroz realizaciju ovog projekta, u budućnosti zaštitimo naše sugrađane, njihovu imovinu te da preventivnim djelovanjem spriječimo scenarij poput onog od prije dvije godine - kazao je načelnik Muzur.

Prethodno su kroz podršku Ministarstva privrede Kantona Sarajevo i tadašnjeg resornog ministra Adnana Delića osigurana sredstva za eksproprijaciju zemljišta, a potom su u dogovoru sa Agencijom za vodno područje rijeke Save, izrađene i linije eksproprijacije u svrhu regulacije korita rijeke Željeznice, nizvodno od mosta u Otesu do ušća u rijeku Bosnu. Izrada elaborata za eksproprijaciju i sam proces eksproprijacije na terenu bili su preduslov za početak radova na uređenja korita.

Rješenje za smanjenje saobraćajnih gužvi

U OTESU IZGRAĐENA KRUŽNA RASKRSNICA

Radovi na novoj kružnoj raskrsnici na ulasku u ilidžansko naselje Otes uspješno su okončani.

Važan projekt za Općinu Ilidža realizovan je za nešto više od mjesec dana, a itekako je bitan s aspekta sigurnosti u saobraćaju u ovom dijelu naše lokalne zajednice.

- Vjerujemo da će ovo rješenje podići nivo sigurnosti u saobraćaju u naselju Otes, te da će na pravi način rasteretiti saobraćajnice koje vode iz centra i ka centru Ilidže - kazao je načelnik Općine Ilidža, Nermin Muzur.

Novi kružni tok posebnu ulogu i važnost ima i zbog činjenice da se nalazi u neposrednoj blizini brze ceste Ilidža - Blažuj.

- Unaprjeđenje saobraćajne infrastrukture vidimo kao stalni zadatak i tako će ostati u budućnosti. To pokazuju i radovi na obnovi ilidžanskih saobraćajnica ali i prateće infrastrukture kao što su novi parking prostori - naglasio je načelnik Muzur.



U blizini brze ceste Ilidža - Blažuj



Uz angažman velikog broja radnika i blizu 40 mašina

VELIKA AKCIJA ČIŠĆENJA DALA REZULTATE, UKLONJENE BROJNE DIVLJE DEPONIJE



Očišćene i uređene zarasle površine

Velika akcija čišćenja na području općine Ilidža odvijala se od 23. do 27. maja, a tokom koje su preduzeća KJKP Park, JP Ilidža, KJKP Rad, KJKP Vodovod i kanalizacija, KJKP Pokop i KJU za zaštićena prirodna područja u koordinaciji s Općinom Ilidža nastojali urediti zarasle površine, ali i ukloniti što više divljih deponija.

Prema dogovorenom planu akcija čišćenja odvijala se u svih 16 mjesnih zajednica općine Ilidža. Uz angažman velikog broja radnika i blizu 40 mašina, akcija je počela u mjesnim zajednicama Hrasnica I, Hrasnica II, Sokolović Kolonija i Vrelo Bosne.

Drugog dana u akciju čišćenja uključili su se građani, privatne kompanije, ali i udruženja s područja općine Ilidža, kao i mehanizacija koju je na raspolaganje stavio Međunarodni aerodrom Sarajevo.

Baš kao i prošle godine petodnevna akcija čišćenja pokazala se kao puni pogodak. Uklonjen je veliki broj divljih deponija, uređene su i velike površine koje su bile potpuno zarasle, a uspješno su riješeni i problemi oko velikog broja začepljenih slivnika na ilidžanskim saobraćajnicama.

Kroz akciju su uređena i korita pojedinih vodotoka, a načelnik Općine Ilidža Nermin Muzur iskazao je zadovoljstvo rezultatima koje je dala ova jako obimna akcija.

- Vjerujem da smo ponovo uspjeli očistiti pojedine dijelove naše lokalne zajednice koji su zbog nemara neodgovornih pojedinaca bili istinsko ruglo naše općine. Nadam se da će naši građani kroz ovakve i slične akcije razviti svijest o održavanju komunalne higijene i javnih površina - rekao je Muzur.

U sklopu akcije odvijala se i podjela kanti za dvolinijski odvoz smeća u ulicama Dobrinjska i Zdenka Markulja, u Mjesnoj zajednici Stup II.

Nastavljen projekt instalacije nove ulične LED rasvjete

OSVIJETLJEN JOŠ JEDAN DIO STOJČEVCA

Nastavljen je projekt instalacije nove ulične LED rasvjete. Nakon što je prošle godine na Stojčevcu, poslije 30ak godina, zasjala nova ulična rasvjeta, finalizirano je i postavljanje novih rasvjetnih tijela na poznatom ilidžanskom izletištu.

- I ove godine ulažemo konstantne napore kako bismo unaprijedili izgled i sadržaje našeg bisera podno Igmana - kazao je načelnik Općine Ilidža Nermin Muzur.

Osim dijela Stojčevca novu uličnu rasvjetu u kompletnoj dužini dobila je i Velika aleja, kao i ulica 15. maj u kojoj je određeni broj rasvjetnih stubova obnovljen, a neki su potpuno novi.



Novu rasvjetu dobila je i Velika aleja

Ukupno 726 učenika devetih razreda i 35 nastavnika ilidžanskih osnovnih škola

MATURANTI U POSJETI TUNELU SPASA



U periodu od 11. do 24. maja 2023. godine

Općina Ilidža nastavila je s realizacijom posjete ilidžanskih osnovaca Tunelu spasa. U više smjena 726 učenika devetih razreda i 35 nastavnika osnovnih škola s područja općine Ilidža posjetili su Tunnel spasa u periodu od 11. do 24. maja 2023. godine.

Objekt čija je uloga bila od neprocjenjive važnosti za opstanak Sarajeva i Bosne i Hercegovine tokom agresije na našu domovinu prvi su posjetili maturanti Prve osnovne škole u pratnji nastavnog osoblja, a potom su uslijedile posjete Treće i Desete osnovne škole, zatim i ostalih ilidžanskih osnovnih škola.

Ova aktivnost, koju su ranijih godina osnovne škole sprovodile u saradnji sa Službom za obrazovanje, sport, kulturu i mlade Općine Ilidža, nakratko je prekinula pandemija koronavirusa.

Poslije 12 godina pauze nastavljena tradicija duga 130 godina

NA HIPODROMU BUTMIR ODRŽANE MEĐUNARODNE KONJIČKE TRKE



Ljubitelji konjičkog sporta imali su priliku uživati u četiri izuzetno zanimljive trke, a zahvaljujući Konjičkom klubu Butmirski galop nastavljena je tradicija konjičkih trka koja na ilidžanskim prostorima traje skoro 130 godina. Glavna trka Općina Ilidža, kojom je zaključena sjajna višesatna sportska manifestacija na hipodromu Butmir, pripala je grlu Aliso kao i vrijedna nagrada od 5.000 KM

Poslije 12 godina pauze, uz pokroviteljstvo Općine Ilidža, konjičke trke vratile su se na Ilidžu, na hipodrom Butmir.

Ljubitelji konjičkog sporta imali su priliku uživati u četiri izuzetno zanimljive trke, a zahvaljujući Konjičkom klubu Butmirski galop nastavljena je tradicija konjičkih trka koja na ilidžanskim prostorima traje skoro 130 godina.

U prvoj trci dana Imperia-Araber, čiji je nagradni fond iznosio 3.000 KM (dužina staze 1.200 metara), trijumfovalo je grlo Lenkoran 350. Drugo mjesto pripalo je Lenkoran XII-8, a treće je bilo grlo Gazal.

Abbey's Wedding, vlasnika Harisa Ganića iz Konjičkog kluba Butmirski galop, bilo je najbrže u trci Prvi memorijal Hameda



Fijakeri su dio tradicije konjičkih trka

Begzadića. Drugi kroz cilj prošao je South Noor. New Pirat je zauzeo treće mjesto, dok je četvrta pozicija pripala grlu Night Moment.

U trećoj trci dana (dužina staze 1.600 metara) pobijedio je Ferrari Twister. Qngfu Panda je bio drugoplasirani, Alan je zauzeo treću poziciju, a Marshal kroz cilj prošao kao četvrti.

Glavna trka Općina Ilidža, kojom je zaključena sjajna višesatna sportska manifestacija na hipodromu Butmir, pripala je grlu Aliso kao i vrijedna nagrada od 5.000 KM. Na drugoj poziciji završio je Thunder Rock, Ghost STS je prošao kao treći kroz cilj, dok je Rosa Dartle bila četvrta.

Nagradu pobjedniku glavne trke uručio je načelnik Općine Ilidža Nermin Muzur, koji nije krio zadovoljstvo zbog povratka konjičkih trka na butmirski hipodrom.

- Drago mi je da smo nakon 12 godina konjičke trke vratili na Ilidžu, na hipodrom Butmir. Mislim da nešto što ima tradiciju duga 130 godina zaslužuje jednu ovakvu manifestaciju, a iskreno se nadam da će ona iz godine u godinu rasti - kazao je načelnik Općine Ilidža Nermin Muzur, te dodao:

- Želio bih čestitati svim pobjednicima, svima koji su izdvojili vrijeme i došli posjetiti trke, ali pohvaliti mladu i ambicioznu ekipu iz i Konjičkog kluba Butmirski galop koji su se pokazali kao odličan organizator. Iskreno se nadam da će uslovi hipodromu u budućnosti bivati sve bolji, baš kao i svake naredne trke.



Zapušteni centralni dio Ilidže otišao u prošlost, realizovan još jedan veliki kapitalni projekt



Na opće zadovoljstvo Općine Ilidža kao organizatora, koncert održan na obnovljenom trgu, koji se prostire na skoro 10.000 kvadratnih metara, a koji je dobio novi izgled, prošao je bez incidenata

Sjajnim koncertom Dženana Lončarevića, koji je privukao više od 12.000 posjetilaca, otvoren je obnovljeni Centralni trg na Ilidži.

Prije nego li je Lončarević svojim hitovima na svojevrsni način kumovao svečanom otvorenju, okupljenim na Centralnom trgu kratko se obratio i načelnik Općine Ilidža, Nermin Muzur.

- Kada smo odlučili da će 12. august biti dan na koji ćemo svečano otvoriti Centralni trg, niko nije mogao znati da će se desiti tragedija kakva se dogodila u Gradačcu. Zbog toga vas molim da s ovog mjesta pošaljemo zajedničku poruku koja će jasno osuditi svaki oblik nasilja. Istovremeno vas molim da minutom šutnje, Fatihom ili na neki drugi prigodan način odamo počast žrtvama iz Gradačca - zamolio je načelnik Muzur prisutne, dok je na velikom videozidu, na bini iza njegovih leđa, stajala poruka "Stop nasilju nad ženama".

Nakon minute šutnje na binu pred Četvrtom gimnazijom, izašao



Poruka načelnika Muzura: Stop nasilju nad ženama

je Dženan Lončarević, a potom je uslijedio veliki vatromet, dok su trgov počeli odzvanjati poznati hitovi srbijanskog pop pjevača.

Da odlična atmosfera vlada na nastupima Dženana Lončarevića u Sarajevu potvrdio je i njegov koncert na Ilidži. Brojna publika i



Lončarević se pobrinuo za fantastičnu atmosferu

fanovi horski su pjevali neke od njegovih pjesama, a Lončarević je publiku na Ilidži rasplesao i pjesmama drugih izvođača. Među njima je bila u poznata numera "Sarajevo ljubavi moja", koju je publika pjevala s njim uglas.

Na opće zadovoljstvo Općine Ilidža kao organizatora, koncert održan na trgu koji se prostire na skoro 10.000 kvadratnih metara a koji je dobio novi izgled, prošao je bez ikakvog incidenta.

Ako je suditi prema koncertu Lončarevića i atmosferi, čini se da je Ilidža dobila upravo ono što joj je nedostajalo, trg na kojem će se moći održavati veliki koncerti i druge kulturno-zabavne manifestacije.



Deset hiljada osoba učesnika prikupilo više od 200.000 KM za pomoć ženama oboljelim od karcinoma dojke

OPĆINA ILIDŽA I OVE GODINE PODRŽALA TRKU/ŠETNJU RACE FOR THE CURE



Dužina staze za sve trkače iznosila je četiri kilometra

Ovogodišnja 16. Race for the Cure trka/šetnja za ozdravljenje održana je u nedjelju, 1. oktobra 2023. godine, u Sarajevu.

Važnost održavanja ove manifestacije kroz koju se pruža pomoć i podršku ženama oboljelim od karcinoma dojke, kao i ranom otkrivanju ove bolesti, i ove godine je prepoznala Općina Ilidža, koja je bila jedan od sponzora.

Kroz organizaciju tima i prikupljanje sredstava načelnik Općine Ilidža Nermin Muzur želio je animirati i druge da budu dio ove jako bitne manifestacije.

- Itekako je bitno poručiti svim ženama koje se bore s ovom opakom bolešću da nisu same i da smo im svakodnevna podrška u borbi za zdravlje i ozdravljenje - rekao je načelnik Općine Ilidža Nermin Muzur, te dodao da će Općina Ilidža i u budućnosti s ponosom biti podrška manifestacijama ovog karaktera.

Deset hiljada osoba prijavilo se za učešće u trci/šetnji Race for the Cure te su tako prikupili više od 200.000 KM za pomoć i podršku ženama oboljelim od karcinoma dojke kao i ranom otkrivanju ove bolesti.

Među brojnim učesnicima ove manifestacije bio je i tim Općine Ilidže, a koji je predvodio načelnik Nermin Muzur, a među članovima našeg tima bila je i Amela Trožić, dvostruka šampionka humanitarne trke Stojčevac 5K, kao i pobjednik premijernog izdanja najmasovnije 5K trke u našoj zemlji Emir Hastor.

Dužina staze za sve trkače iznosila je četiri kilometra, dok je staza za šetače bila duga 1,5 kilometara.

Federalno ministarstvo rada i socijalne politike sufinansira izgradnju dnevnog centra na području Ilidže

MUZUR I DELIĆ POTPISALI VAŽAN UGOVOR

Načelnik Općine Ilidža Nermin Muzur i federalni ministar rada i socijalne politike Adnan Delić potpisali su ugovor prema kojem će resorno ministarstvo sufinansirati izgradnju dnevnog centra za djecu s teškoćama u razvoju, a koji će se nalaziti na području općine Ilidža.

Ideja o zajedničkoj realizaciji ovog projekta nastala je proteklog ljeta prilikom posjete ministra Delića Općini Ilidža.

- Ideju smo potvrdili potpisivanjem ugovora prema kojem će resorno ministarstvo finansijski podržati izgradnju dnevnog centra, a koji će se nalaziti u našoj lokalnoj zajednici. Za

navedeni centar imamo lokaciju. Pred nama je faza projektovanja i pripremanje finansijskog okvira za realizaciju jednog od najpotrebnijih projekata u našoj lokalnoj zajednici - kazao je načelnik Općine Ilidža Nermin Muzur, te dodao:

I ministar Delić iskazao je svoje zadovoljstvo potpisanim Sporazumom i projektom na kojem će raditi s Općinom Ilidža.

- Potpisivanjem ugovora pokazali da smo opredjeljeni pomoći Općini Ilidža, finansijski i na svaki drugi način da ovaj centar uskoro otvori vrata svojim budućim korisnicima - naglasio je Adnan Delić, ministar rada i socijalne politike FBiH.

Osmijesi i graja naših najmlađih sugrađana nakratko kreirali posve drugačiji ambijent

DJECA IZ VRTIĆA LUŽANI POSJETILA OPĆINU



Mališani u Multifunkcionalnoj sali Općine Ilidža

U pratnji odgajateljica mališani iz vrtića "Lužani" posjetili su Općinu Ilidža, a njihovi domaćini bili su dopredsjedavajući Općinskog vijeća Ilidža, Selver Zečirović i Amar Bungur.

Djeca su posjetila Multifunkcionalnu salu, salu za sastanke, a oni najradoznaliji "zavirili" su i u pojedine kancelarije.

Osmijesi i graja naših najmlađih sugrađana nakratko su kreirali posve drugačiji ambijent, a ova posjeta samo je jedna od potvrda da u zgradi Općine Ilidža ima mjesta za sve njene građane i da su svi jednako važni, pogotovo oni na kojima počiva naša budućnost.

Ovom posjetom mališani su nam uzvratili posjetu, s obzirom na to da su načelnik Općine Ilidža Nermin Muzur i rukovodstvo OV Ilidža početkom juna ove godine bili gosti vrtića Lužani.



Realizacijom važnog kapitalnog projekta Općina Ilidža uspješno revitalizirala Veliki park

OBEĆANJE ISPUNJENO: OBNOVLJENA ZELENA OAZA IZ DOBA AUSTRO-UGARSKE



Ilidža i Kanton Sarajevo dobili su atraktivan turistički sadržaj

Veliki park koji se prostire na blizu 50.000 kvadratnih metara datira još iz vremena Austro-Ugarske i predstavlja jedan od najljepših parkova u Kantonu Sarajevo, u Bosni i Hercegovini, ali i šire

Na početku Velike aleje svečano je otvoren obnovljeni Veliki park, mjesto za odmor i rekreaciju koji će zasigurno postati omiljeno mjesto za sve ljude željne prirode, opuštanja i zabave.

Zelena oaza koja se prostire na površini blizu 50.000 kvadratnih metara datira još iz vremena Austro-Ugarske i predstavlja jedan od najljepših parkova u Kantonu Sarajevo, ali i šire.

Revitalizirani Veliki park građanima će pružiti mogućnost da uživaju u prirodi i zajedničkim aktivnostima, a njegov centralni dio čine četiri amfiteatra različitih dimenzija koji su kreirani za održavanje kulturno-zabavnih manifestacija. Svoja vrata Veliki park posjetiocima je zvanično otvorio nakon što su načelnik Općine Ilidža Nermin Muzur i direktor Javnog preduzeća Ilidža Jasmin Viteškić svečano presjekli vrpću.

Poslije kratke šetnje parkom, načelnik Muzur je naglasio kako će ovaj prostor biti domaćin svima onima koji žele pronaći svoje mjesto, bilo da žele tišinu za razmišljanje ili vrijeme za opuštanje.

- U eri zgrada i betona mi uspješno gradimo i obnavljamo parkove. Nakon revitalizacije Stojčevca, izgradnje SRC Čarli i obnove Centralnog trga, vraćanje Velikog parka građanima još je jedan važan korak ka izgradnji sadržaja kakvi su nedostajali Ilidži. Što je obećano, ispunjeno je i možemo reći da je Općina Ilidža u Kantonu Sarajevo prepoznatljiva kao općina s najviše pozitivnih promjena u proteklom periodu - poručio je Muzur.



Glumci u ulogama Ferdinanda, Sofije i Gavrila Principa

Načelnik je kazao da su na opće zadovoljstvo svih iznađena efikasna rješenja kako bi stogodišnja stabla bila sačuvana i ostala dio prirodne ljepote Velikog parka koji je historijsko naslijeđe Ilidže, Sarajeva i Bosne i Hercegovine.

U saradnji s Općinom Ilidža Javna ustanova Muzej Sarajevo upriličila je i izložbu "Sarajevo 1878. - 1918.", a koja je dala jasan prikaz kulturno-historijskog naslijeđa u pomenute četiri decenije. Kroz izložbu je tematizirana i službena posjeta Sarajevu prijestolonasljednika Austro-Ugarske Monarhije Franca Ferdinanda i njegove supruge Sofije, koji su odsjeli baš na Ilidži.

Prigodan muzičko-plesni program nakratko je sve posjetioce vratio stotinjak godina unazad u period kada su Velikim parkom šetali Ferdinand i njegova supruga.

FOTOGALERIJA



Prirodno blago općine Ilidža



Dotrajale drvene konstrukcije zamijenjene novim

SPOMENIK VRELO BOSNE DOBIO NOVE MOSTOVE I NOVI SANITARNI ČVOR

Najimpresivnije prirodno blago Ilidže, Vrelo Bosne, dobilo je potpuno novi sanitarni čvor, a rekonstrukcijom nekoliko drvenih mostova nastavljeno je ulaganje u infrastrukturu ovog područja.

Vrelo Bosne, Velika aleja i Stojčevac predstavljaju jednu cjelinu od iznimne važnosti za Ilidžu, a što potvrđuju i zajednički projekti na unaprjeđenju sadržaja koje nudi ovaj dragocjeni resurs, kojim uspješno upravlja KJU za zaštićena prirodna područja Sarajevo.

Lokalitet Vrela Bosne jedan je od sinonima za Ilidžu. Kao izvor pitke vode i turistička atrakcija ono obogaćuje našu lokalnu zajednicu i doprinosi njenom identitetu. Očuvanje ovog spomenika prirode od neprocjenjive je važnosti, zbog čega Općina Ilidža ima poseban odnos prema Vrelu Bosne.

Nastavljena revitalizacija poznatog ilidžanskog izletišta



Ljulaška pored jezera idealna za sjajne fotografije

Obnova i rehabilitacija Stojčevca, proces je koji traje i koji će sigurno još trajati. No, popularno izletište posjetiocima svako malo svojim posjetiocima ponudi neki novi sadržaj.

Projekt uređenja drvenih staza oko jezera nastavljen je u saradnji s KJU za zaštićena područja Sarajevo. Pored još jedne drvene staze, Stojčevac je dobio i drvenu ljulašku pored jezera, što je idealno mjesto za nastanak sjajnih fotografija.

Na popularnom izletištu obnovljena su i dva terena za basket, a u planu su i drugi sportski sadržaji.

Lokalitet koji su do nedavno svi zaobilazili sada je jedan od najpoželjnijih za izlete djece školskog i predškolskog uzrasta.



Povodom 30. godišnjice pogibije Emira Bogunića Čarlija, komandira voda Četvrtе viteške motorizovane brigade

PREMIJERNO PRIKAZAN DOKUMENTARNI FILM "ČARLI - PREKO GRANICA HRABROSTI"



Dvorana hotela Hills bila je ispunjena do posljednjeg mjesta

Premijera dokumentarnog filma "Čarli - Preko granica hrabrosti", održana je u hotelu Hills uz prisustvo velikog broja zvanica.

Film autora Avde Huseinovića posvećen rahmetli Emiru Boguniću - Čarliju, komandiru voda Četvrtе viteške motorizovane brigade i jednom od njenih najistaknutijih boraca, koji je poginuo u borbama na Golom brdu 28. jula 1993. godine, na planini Igman, realizovan je uz podršku Općine Ilidža i Ministarstva za boračka pitanja Kantona Sarajevo.

Prije projekcije filma prisutnima se obratio Zijad Hasečić, predsjednik Udruženja dobitnika najvećih ratnih priznanja "Zlatni ljiljan" i "Zlatna policijska značka" općine Ilidža, a potom i načelnik Općine Ilidža Nermin Muzur.

- Ovo je sigurno projekt na koji ću biti najponosniji kada završim svoj mandat u Općini Ilidža jer je ovo priča o našoj domovini, o

pravim Bosancima i Hercegovcima, ovo je priča o najboljim i najhrabrijim ljudima među nama. Ovo je početak naših filmova, pisanja i djela kroz koja ćemo govoriti o najhrabrijim ljudima na slobodnim teritorijama općine Ilidža koji su dali nemjerljiv doprinos za naš opstanak.

Autor filma Avdo Huseinović istakao je da bi film o Čarliju mogao ući i u Guinnessovu knjigu rekorda s obzirom na to da je snimljen u rekordnom vremenskom roku.

- Na nekim filmovima radimo i po godinu ili više, ali ovaj film je jedinstven i po kratkom vremenskom roku u kojem smo ga završili - rekao je Huseinović.

Autor je naglasio da u mnoštvu filmova i intervjuja koje je uradio u proteklih 15 godina ovo bio tek drugi film gdje su saborci plakali za svojim nadređenim, a to mnogo govori o samom filmu.

Sjećanje na ilidžanske heroje odbrambeno-oslobodilačkog rata

POČAST ZA ČARLIJA I NJEGOVE SABORCE

Polaganjem cvijeća i učenjem Fatihe na Golom brdu na Igmanu odata je počast Emiru Boguniću Čarliju, komandiru voda Četvrtе viteške motorizovane brigade, sestrama Samiri i Mevlidi Elčić kao i Džemailu Bulbulu koji su poginuli 28. jula 1993. godine.

Tužna trideseta godišnjica na Golom brdu okupila je porodice poginulih, saborce, prijatelje, predstavnike boračkih udruženja, političkih partija, ali i zakonodavne i izvršne vlasti.

Poštovanje Čarliju i saborcima iskazala je i delegacija Općine Ilidža predvođena načelnikom Nerminom Muzurom, a cvijeće je položio i Omer Osmanović, ministar za boračka pitanja KS.

Nakon odavanja počasti na Golom brdu, brojne delegacije položile su cvijeće na mezarima Emira Bogunića i Ejuba Sarajkića.



Golo brdo čuva tužne uspomene na heroje

Dvodnevni skup čiji je partner bila Općina Ilidža okupio više od 250 učesnika

NAČELNIK MUZUR MEĐU PANELISTIMA 10. SARAJEVO MARKETING SUMMITA



Tema konferencije bila je "Marketing Mastery"

Jubilarni 10. Sarajevo Marketing Summit, koji je ove godine okupio preko 250 učesnika, održan je na Ilidži. Općina Ilidža bila je partner ovog dvodnevnog skupa kojem je prisustvovao niz istaknutih govornika iz svijeta marketinga, uključujući vodeće marketinške stručnjake, preduzetnike i digitalne inovatore, a jedan od panelista bio je i načelnik Općine Ilidža Nermin Muzur.

Upravo je načelnik otvorio 10. Sarajevo Marketing Summit te naglasio da je ponosan što je mu je Ilidža domaćin i ove godine.

- Prije svega moram reći da mi je čast i zadovoljstvo što sam ovdje s vama i što imam priliku otvoriti jubilarno izdanje Sarajevo Marketing Summita. Na Ilidži se trudimo praviti kvalitetne sadržaje i turističke proizvode, koje će moći konzumirati ljudi ne samo s područja Ilidže, već iz cijelog Kantona, pa i šire - rekao je načelnik Muzur.

Tema konferencije bila je "Marketing Mastery" kojom se naglašava kontinuirana evolucija u marketingu, kao i postavljanje temelja za postizanje vrhunskih marketinških vještina.

Marketing Summit ujedno je prilika za učenje i inspiraciju ali i za saradnju između različitih sektora.

- Mojoj generaciji u djetinjstvu nedostajalo je mnoštvo sadržaja koji bi upotpunili naše odrastanje. Na osnovu toga znao sam šta trebamo napraviti i ponuditi onima koji trenutno prolaze kroz fazu djetinjstva. To je ono što me pokreće i poseban je osjećaj zadovoljstva kada vidite svu tu djecu kako vrijeme provode na kvalitetan način. U naše parkove ne dolaze samo djeca s Ilidže, već iz cijelog Sarajeva - rekao je Muzur, te dodao da Općina Ilidža nije radila samo na uljepšavanju pojedinih dijelova Ilidže, već je postala primamljiva velikim kompanijama.

Poslovni događaj "Povećanje ekonomske razmjene između Bosne i Hercegovine i Slovenije"

ILIDŽA DOMAĆIN POSLOVNIM SUSRETIMA

Domaćin poslovnom događaju "Povećanje ekonomske razmjene između Bosne i Hercegovine i Slovenije" kojeg je organizovalo Udruženje poslodavaca u FBiH i Slovenian Business Club bila je Ilidža.

Ovom događaju koji je bio idealna prilika da se čuju neke nove ideje, mišljenja, razmijene iskustva i ostvare nove saradnje, prisustvovao je i načelnik Općine Ilidža Nermin Muzur.

Osim činjenice da dijele zajedničku prošlost, Bosna i Hercegovina i Slovenija dijele i potencijal za uspostavljanje još bližih ekonomskih veza u budućnosti.

Posljednjih godina postignuti su znatni koraci u smjeru povećanja ekonomske razmjene između dvije zemlje, što je rezultiralo zajedničkim rastom i razvojem.

Općina Ilidža pokazuje duboko razumijevanje važnosti privrednog sektora i njegovog doprinosa lokalnoj ekonomiji, zato se nastoje ispratiti svi trendovi i tokovi, a koji se odnose na razvoj privrede i unaprjeđenja poslovnih ideja.

Kroz posjete privrednicima, Općina Ilidža stvara prostor za dijalog o infrastrukturnim projektima koji mogu poboljšati uslove poslovanja, ali i podršku ekonomskom razvoju.



Stojčevac poslužio kao lokalitet za simulaciju zemljotresa i njegovih posljedica na području općine Ilidža



ODRŽANA POKAZNA VJEŽBA "SPREMNOST STRUKTURA CIVILNE ZAŠTITE OPĆINE ILIDŽA"

Cilj pokazne vježbe je pripremanje i preventivno djelovanje Službe civilne zaštite Općine Ilidža te da se testira spremnost i koordinacija u hitnim situacijama i na različite scenarije nesreća i katastrofa

Pokazna vježba "Spremnost struktura i postrojavanja civilne zaštite Općine Ilidža" u kojoj su učestvovalе sve strukture Civilne zaštite Općine Ilidža održana je na Stojčevcu, a počela je smotrom ispred Doma kulture u Hrasnici.

Načelnik Općine Ilidža Nermin Muzur, koji je ujedno i komadant Štaba civilne zaštite Općine Ilidža, istakao je da se u prethodnom periodu uradilo mnogo aktivnosti, kako na opremanju, tako na edukovanju struktura Civilne zaštite kako bi se pravovremeno reagovalo u nepredviđenim situacijama.

- Cilj pokazne vježbe je pripremanje, vježbanje i preventivno djelovanje Službe civilne zaštite Općine Ilidža. Nažalost 2021. godine imali smo iskustvo s poplavama koje su nam pokazale značaj ovih struktura i koliko je lokalna zajednica spremna da odgovori zadatku. U narednom periodu nastavit ćemo s opremanjem struktura Civilne zaštite Općine Ilidža i na podizanju nivoa spremnosti - kazao je načelnik Nermin Muzur.

Uz spremnost i koordinaciju u hitnim situacijama, testirana je pravilna i pravovremena reakcija na različite scenarije nesreća.

U vježbi su učestvovali Štab civilne zaštite Općine Ilidža, Služba civilne zaštite Općine Ilidža, službe zaštite i spašavanja, povjerenici Civilne zaštite Općine Ilidža i pripadnici Policijske stanice Ilidža.

Plan vježbe bio je simulacija zemljotresa i njegovih posljedica na području općine Ilidža. Osim uklanjanja krhotina, spašavanja i pružanja medicinske pomoći, vježba je obuhvatila i evakuaciju građana iz ugroženih područja, kao i njihov transport.



Postrojavanje ispred Doma kulture u Hrasnici

Jedan od ključnih aspekata vježbe bila je koordinacija između različitih timova, kao i brzina i usklađenost koje su od velikog značaja u situaciji stvarne nesreće.

Službe zaštite i spašavanja trenutno broje 215 članova, a plan je da se do naredne godine brojka poveća na 300 članova.

- Želimo biti, kao i lokalna zajednica, najopremljenija i najbolja civilna zaštita. Nadamo se da ćemo svu tu opremu i spremnost demonstrirati isključivo kroz pokazne vježbe - naglasio je Muzur, te se zahvalio svim akterima vježbe.

Pokazne vježbe poput ove ključne su za pripremu zajednice i minimiziranje potencijalnih šteta u slučaju vanrednih situacija, a istovremeno podsjećaju na važnost uloge civilne zaštite u našim zajednicama. Brza reakcija, dobra koordinacija i profesionalnost ulijevaju povjerenje u mogućnost timova Civilne zaštite da zaštite građane u slučaju stvarne nesreće i katastrofe.



Prostor namijenjen građanima treće životne dobi nalazi se na adresi Samira Čatovića Kobre 39

U LUŽANIMA OTVOREN DRUGI CENTAR ZA ZDRAVO STARENJE NA PODRUČJU ILIDŽE



Načelnik Muzur presjekao vrpcu

Centar za zdravo starenje u Lužanima, drugi takve vrste na području općine Ilidža, otvorio je vrata svojim korisnicima. Izuzetno važan projekt, u kojem će svoje aktivnosti moći upražnjavati naši najstariji sugrađani, otvorio je načelnik Općine Ilidža Nermin Muzur.

Centar za zdravo starenje u Mjesnoj zajednici Lužani nalazi se

na adresi Samira Čatovića Kobre 39.

Prostor je u potpunosti obnovljen i adaptiran tako da korisnici uz druženje u njemu imaju priliku učestvovati u različitim aktivnostima i radionicama koje Centar organizuje.

- Kroz realizaciju ovog projekta željeli smo pokazati da su sve kategorije stanovništva Općini Ilidža jednako važne - rekao je načelnik Nermin Muzur, te naglasio da ovaj Centar sigurno neće biti posljednji objekt ovog tipa na području Ilidže.

Izvršna direktorica Udruženja Partnerstvo za javno zdravlje, Sejdefa Bašić, istakla je da ovakva vrsta centara može donijeti samo dobro našoj zemlji.

- Raduje me činjenica što će stanovnici općine Ilidža imati priliku uživati u ovom prekrasnom prostoru - poručila je Sejdefa Bašić u svom obraćanju.

Menadžerica Centra, Adnana Podrug, kazala je da će prostorije centra za članove biti otvorene od ponedjeljka do petka u periodu od 9 do 15 sati. Inače, prvi Centar za zdravo starenje na području općine Ilidža otvoren je u septembru 2020. godine u Hrasnici.

U centrima za zdravo starenje Hrasnica i Lužani obilježen Međunarodni dan starijih osoba

BRIGA O NAJSTARIJIM STANOVNICIMA ILIDŽE

U sklopu obilježavanja Međunarodnog dana starijih osoba, Zdravstveni savjet Općine Ilidža organizovao je međugeneracijsko druženje koje su omogućili predani volonteri Crvenog križa općine Ilidža, Merhameta - Osnovni odbor Ilidža i članova Zdravstvenog savjeta Općine Ilidža s korisnicima Centra za zdravo starenje Hrasnica i Lužani.

Ovaj poseban događaj, koji se održao u centrima za zdravo starenje u Hrasnici i Lužanima, bio je prilika za spajanje različitih generacija i stvaranja mostova među generacijama.

Volonteri su se angažovali s ciljem pružanja podrške i osigurali

da stariji građani dožive nezaboravne trenutke ljubavi, pažnje i raznolikosti.

U skladu s temom Međunarodnog dana starijih osoba, volonteri s članovima Zdravstvenog savjeta Općine Ilidža organizovali su niz aktivnosti prilagođenih interesima starijih sugrađana.

Razgovori o životnim iskustvima, zajedničko druženje i dijeljenje ideja stvarali su toplu atmosferu ljubaznosti.

Međunarodni dan starijih osoba obilježava se svake godine kako bismo naglasili važnost poštovanja i brige prema starijima.

Federalni ministar unutrašnjih poslova Ramo Isak posjetio Općinu Ilidža i načelnika Nermina Muzura

RAZGOVARALI O UNAPRJEĐENJU SARADNJE



Načelnik Muzur i ministar FMUP-a Ramo Isak

Općinu Ilidža i načelnika Nermina Muzura posjetio je federalni ministar unutrašnjih poslova Ramo Isak.

Kroz produktivan razgovor načelnik Muzur predstavio je ministru Isaku dosadašnji rad, kao i aktivnosti Općine Ilidža za naredni period. Iskazana je obostrana podrška za nastavak saradnje koju Općina ima sa Federalnim ministarstvom unutrašnjih poslova.

Načelnik Nermin Muzur zahvalio se Isaku na posjeti, istakavši da je podrška i saradnja sa svim nivoima vlasti itekako neophodna u cilju nastavka i uspješne realizacije projekata u budućnosti.

Zbog specifičnosti naše lokalne zajednice i rješavanja izazova migrantske krize itekako nam je važna saradnja s Federalnim ministarstvom unutrašnjih poslova - rekao je načelnik Muzur.

Obilježena 31. godišnjica Bitke za Stojčevac



14. i 15. maja 1992. godine hrabrošću bh. patriota iz Kovača i Hrasnice agresor spriječen da ovlada ratnim putem

Veliki broj građana Ilidže, članova šehidskih porodica, bivših pripadnika Armije Republike Bosne i Hercegovine prisustvovao je obilježavanju 31. godišnjice Bitke za Stojčevac

Godišnjica osnivanja Drugog motorizovanog bataljona Četvrte viteške motorizovane brigade obilježena je učenjem Fatihe i polaganjem cvijeća na Spomen-obilježju šehidima i poginulim borcima u Hrasnici i na mezarju Kovači, dok je centralna manifestacija održana na Stojčevcu.

Upravo na lokalitetu gdje je 14. i 15. maja 1992. godine hrabrošću i odlučnošću bosanskohercegovačkih patriota iz Kovača i Hrasnice agresor spriječen da ovlada ratnim putem preko Igmana, koji je bio žila kucavica opkoljenog Sarajeva sve do završetka rata, otkriveno je novoizgrađeno Spomen-obilježje za 67 šehida Drugog motorizovanog bataljona Četvrte viteške motorizovane brigade.

Veliki broj građana, članova šehidskih porodica, bivših pripadnika Armije Republike Bosne i Hercegovine prisustvovao je obilježavanju 31. godišnjice Bitke za Stojčevac, a delegaciju Općine Ilidža pored načelnika Nermina Muzura činili su

predsjedavajući Općinskog vijeća Ilidža Tarik Stambolić, kao i njegov zamjenik Selver Zećirović.

Počast šehidima odali su i članovi njihovih porodica, delegacije brojnih boračkih udruženja, kao i političkih partija.

- Za mene je ovo poseban dan i posebna emocija. Obilježavamo dan naselja u kojem sam se rodio i u kome sam odrastao, gdje sam proveo svoje djetinjstvo tokom agresije na Bosnu i Hercegovinu. Nažalost nisam imao priliku da poput današnje djece imam normalno djetinstvo jer sam ga uglavnom proveo po podrumima - prisjetio se načelnik Općine Ilidža Nermin Muzur dešavanja tokom agresije u uvodu svog prilično emotivnog govora.

Načelnik Muzur je naglasio da je ponosan na svoju generaciju zbog uslova u kojima su odrastali i stasali, kao i zbog onoga što su ostvarili i još uvijek ostvaruju.

- Hvala Bogu, uspjeli smo završiti i Spomen-obilježje za 67 najhrabrijih sinova naše domovine. Zahvaljujući njima smo bili u prilici da prošle godine počnemo s obnovom Stojčevca i da mu vratimo stari sjaj. Prošle godine nisam smio obećati da ćemo već ove godine imati ovo Spomen-obilježje, koje će, hvala Bogu, svjedočiti da je ovih 67 ljudi dalo svoje živote da bismo mi živjeli u slobodi - naglasio je Muzur.

Otvaranje Spomen-obilježja šehidima Drugog motorizovanog bataljona Četvrte viteške motorizovane brigade prigodnim kulturno-historijskim uveličali su i učenici Druge osnovne škole izvedbom nekoliko ilahija i muzičkih numera.



Učenici Druge osnovne škole



Neprocjenjiv "alat" u zaštiti ljudskih života i imovine tokom nepredviđenih situacija

TERENSKO VOZILO ZA CIVILNU ZAŠTITU



Primopredaja ključeva novog vozila

Civilna zaštita Općine Ilidža dobila je novo terensko vozilo koje predstavlja važnu komponentu opreme koja značajno olakšava i poboljšava izvršavanje zadataka.

Vozilo je posebno prilagođeno kako bi ispunilo različite potrebe i

izazove s kojima se suočavaju pripadnici Službe civilne zaštite Općine Ilidža.

Načelnik Općine Ilidža, Nermin Muzur, istakao je da je od ključne važnosti nabavka adekvatnih materijalno-tehničkih sredstava, kako bi se broj članova Službe zaštite i spašavanja Općine Ilidža u narednom periodu sa 215 povećao na 300.

- Terenska vozila Civilne zaštite igraju važnu ulogu u poboljšanju učinkovitosti i uspješnosti reakcije na krizne situacije. Njihova sposobnost da olakšaju pristup teško dostupnim mjestima, pruža potrebne resurse i podršku pripadnicima CZ, čini ih neprocjenjivim alatom u zaštiti ljudskih života i imovine tokom nepredviđenih situacija. Novo terensko vozilo predstavlja vrijedan dodatak našim resursima i opremi koja nam omogućava bolju zaštitu naših građana. Neka ovo vozilo služi kao simbol naše spremnosti da se suočimo s bilo kojom kriznom situacijom - poručio je Muzur, tokom primopredaje vozila načelniku Štaba CZ, Enesu Čorbi.

Na 23. redovnoj sjednici Općinskog vijeća Ilidži



Povećana osnovica stipendija za srednjoškolce i studente

OPĆINA ILIDŽA REKORDER PO IZNOSU STIPENDIJA

Na 23. redovnoj sjednici Općinskog vijeća Ilidža, jedna od tačaka dnevnog reda bio je i Prijedlog pravilnika o stipendiranju učenika i studenata Općine Ilidža, a čiji je predlagač bio načelnik Općine Ilidža Nermin Muzur.

Prijedlog je razmatran i jednoglasno usvojen. U obraćanju vijećnicima, načelnik Muzur naglasio je da će Općina Ilidža biti općina s najvišim stipendijama kada su u pitanju učenici i studenti s područja općine Ilidža.

- Na osnovu evidencija do kojih smo došli u ostalim gradovima i općinama, odlučili smo da napravimo najveći iskorak kada su u pitanju stipendije. Osnovicu smo sa 60 povećali na 110 KM i smatram da je ovo naš najbolji potez i odgovor na teško vrijeme u kojem živimo, kao i na vrijeme u kojem pričamo o mladima. Najveća stipendija ide čak do 220 KM i smatram da je to jedna sasvim adekvatna, konkretna i velika pomoć svakoj porodici i djetetu u narednom periodu - poručio je načelnik Muzur.

Osim što pomažu u pokrivanju školskih i fakultetskih troškova, stipendije pružaju priliku za ostvarivanje obrazovnih snova i postizanje akademskih ciljeva, ali i potiču izvrsnost i doprinose raznolikosti u obrazovanju.

Delegacija FK Sarajevo u posjeti Općini Ilidža

BIVŠI ZMAJ U POSJETI NAČELNIKU MUZURU

Načelnik Općine Ilidža Nermin Muzur ugostio je sportskog direktora Fudbalskog kluba Sarajevo Senijada Ibričića i člana stručnog štaba Bordo tima profesora Eldina Jeleškovića. Sastanak s bivšim reprezentativcem Bosne i Hercegovine kao i nekadašnjim članom stručnog štaba Zmajeva protekao je u ugodnoj atmosferi, a teme sastanka bile su isključivo sportske.

- Za Općinu Ilidža, kao lokalnu zajednicu koja je opredijeljena da razvija sport i sportsku infrastrukturu, jako je važan podatak da FK Sarajevo već dugi niz godina posjeduje trening-kamp upravo na teritoriji naše općine - rekao je načelnik Muzur.

Ilidža je kroz historiju izrodila velika imena bh. sporta, a broj fudbalera koji su "zanat ispekli" na Ilidži, a kasnije obukli bordo dres, nije mali, što znaju i u klubu s Koševa. U prijatnom razgovoru načelnik Muzur i bivši Zmaj razmijenili su i neke zanimljive ideje od kojih bi koristi u budućnosti mogla imati lokalna zajednica ali i FK Sarajevo.

- Općina Ilidža nastoji biti prepoznata kao sportska sredina. Imponuje nam činjenica da naša najbolja selekcija nakon odlaska iz Hrasnice, vjerujem privremenog, i dalje se okuplja i trenira na Ilidži - naglasio je načelnik Muzur.



Prigodan poklon Senijada Ibričića za načelnika



Ljetna pozornica obje festivalske večeri bila je ispunjena ljubiteljima narodne muzike

ILIDŽANSKI FESTIVAL ISPUNIO OČEKIVANJA, "PJESMO MOJA" POBJEDNIČKA NUMERA



Pobjednica Merjema Alihodžić nastupila je i druge festivalske noći, u revijalnom dijelu programa

Nagradu za najbolji aranžman dobio je Suad Jukić za "Jedan mi je život malo", dok je pobjedničkoj kompoziciji "Pjesmo moja", autorice Mensure Bajraktarević, pripala i nagrada za najbolji tekst

Na prepunoj Ljetnoj pozornici Ilidža, titulu pobjedničke pjesme takmičarske večeri Festivala narodne muzike Ilidža 2023. osvojila je Merjema Alihodžić s numerom "Pjesmo moja". Ova kompozicija osvojila je najveći broj bodova stručnog žirija i SMS glasova publike, a nagradu za najbolju pjesmu ovogodišnjeg festivala uručio je načelnik Općine Ilidža Nermin Muzur.

- Prelijepa noć i posebna emocija. Ljetna pozornica koja je bila ispunjena do posljednjeg mjesta samo je pokazatelj koliko Ilidžancima znači ovaj festival. Svim učesnicima čestitam, a našoj Merjemi puno uspjeha u nastavku karijere - istakao je načelnik Muzur.

Žiri su činili Hanka Paldum, Snežana Đurišić, Armin Šaković, Benjamin Isović, Fadil Šabović, Ashar Kurtović i Branko Uvodić.



Nastup Nikole Rokvića



Publika je uživala u obje festivalske večeri

U takmičarskoj večeri učestvovalo je ukupno petnaest kompozicija i izvođača te su dodijeljene tri nagrade. Nagradu za najbolji aranžman dobio je Suad Jukić za kompoziciju "Jedan mi je život malo", dok je pobjedničkoj kompoziciji "Pjesmo moja", autorice Mensure Bajraktarević, pripala i nagrada za najbolji tekst.

Revijalna noć Festivala narodne muzike "Ilidža 2023" privukla je jednako veliki interes publike kao i takmičarski program. Velika imena narodne muzičke scene poput Hanke Paldum, Snežane Đurišić, Dragana Kojića Kebe, Nikole Rokvića, Muharema Serbezovskog, Elvire Rahić, Slađane Mandić, Nedžada Salkovića, Ferida Avdića, Nihada Alibegovića, Cecilije, Hamida Ragipovića Beska i Šećeta Hamidovića Ringa zaslužna su za odličnu posjetu na Ljetnoj pozornici.



Veliki broj Ilidžanki i Ilidžanaca i ove godine učestvovalo je u izboru koji organizuje Općina Ilidža

NASTAVLJENA DUGOGODIŠNJA TRADICIJA, IZABRANA NAJLJEPŠA DVORIŠTA I BALKONI



Pobjedničko dvorište Aida Kaltak

Tradicija izbora najljepših ilidžanskih dvorišta i najuređenijih balkona seže više od 60 godina unazad. S ciljem očuvanja ove tradicije Općina Ilidža je i ove godine organizovala izbor najljepšeg dvorišta i balkona sa cvjetnim aranžmanom.

Prvu nagradu za najljepše dvorište osvojila je Aida Kaltak iz Butmira. Drugo mjesto pripalo je dvorištu Amre Mujkić, koje se

nalazi u ulici Tukovi (Mjesna zajednica Osjek), dok je na trećoj poziciji u izboru završilo dvorište Feride Efendić iz Rakovice.

Kao najljepši balkon s cvjetnim aranžmanom na području općine Ilidža u 2023. godini proglašen je balkon Emire Kurtović u ulici Hamze Čelenke 35 b (Mjesna zajednica Lužani). Druga nagrada dodijeljena je balkonu u ulici Senada Fazlića 39 (Mjesna zajednica Otes) vlasnice Medine Čoso, dok je treće mjesto pripalo balkonu Nedžada Lokvančića u ulici Lamekanija 4 (Mjesna zajednica Hrasnica II).



Dvorište Amre Mujkić zauzelo je drugo mjesto

Javni pozivi za raspodjelu sredstava za projekte iz oblasti sporta, kulture i obrazovanja, te projekata za mlade

VIŠE OD POLA MILIONA KM ZA 149 PROJEKATA

Općina Ilidža podržala je ukupno 121 projekt iz oblasti sporta, kulture i obrazovanja kroz Javni poziv za raspodjelu sredstava za finansiranje projekata iz oblasti sporta, kulture i obrazovanja iz Budžeta Općine Ilidža za 2023. godinu

Nakon potpisa ugovora aplikantima koji su ispunili uslove za dodjelu sredstava kratko se obratio i načelnik Općine Ilidža Nermin Muzur.

- Kultura, sport i obrazovanje trebali bi biti stubovi svake pa tako i naše lokalne zajednice, stubovi čiji su temelj mladi - rekao je načelnik Općine Ilidža Nermin Muzur, te dodao:

- Iz godine u godinu nastojimo taj "temelj" ojačati i učiniti čvršćim. Ove godine smo pola miliona KM izdvojili za projekte iz oblasti kulture, sporta i obrazovanja, što je povećanje od deset posto u odnosu na prošlu godinu. Ipak, sve će nam biti uzaludno ako dvorane i tereni budu prazni.

Među 121 projektom Općina Ilidža je podržala 78 projekata iz oblasti sporta, 19 iz oblasti kulture, te 24 iz oblasti obrazovanja.

Po Javnom pozivu za (su)finansiranje projekata za mlade iz Budžeta Općine Ilidža za 2023. godinu odobrila je ukupno 30.000 KM na ime (su)finansiranja 28 projekata.

U sklopu projekta koji je dio 13. transverzale

POČELA IZGRADNJA RASKRSNICE NA STUPU



Projekt koji je izuzetno važan za Ilidžu

U sklopu projekta koji je dio 13. transverzale, počeli su radovi na izgradnji raskrsnice na Stupu u naselju Bulevar. Nove isključne trake u oba pravca, kao i nova tramvajska stajališta, zasigurno će smanjiti gužve na ovoj lokaciji i omogućiti brži pristup građanima Stupa.

Kroz ovaj projekt uradit će se i pješaka staza od Energoinvesta do naselja Bulevar, što će povećati sigurnost, ali i olakšati kretanje građana u ovom dijelu naše lokalne zajednice.

- Neke projekte realizujemo brže, za neke je potrebno vrijeme i saradnja s višim nivoima. Najvažnije da su to projekti koje su građani delegirali kao prioritete - istakao je načelnik Općine Ilidža Nermin Muzur, te se zahvalio na saradnji Vladi Kantona Sarajevo i ministru saobraćaja Adnanu Šteti.



Na Ljetnoj pozornici i u Multimedijalnom centru Kina Igman prikazano ukupno pet filmskih projekcija

ILIDŽA DOMAĆIN PROJEKCIJAMA 15. OFF-A



Načelnik Muzur pozdravio prisutne na prvoj projekciji

Dodjelom nagrada, završen je 15. Omladinski film festival Sarajevo. Posljednje festivalske noći prikazana su tri filma. Na Ilidža Open Airu ljubitelji filma mogli su gledati film "Two lottery tickets", što je bila ukupno peta projekcija koju je ugostila Ljetna pozornica odnosno sala Multimedijalnog centra Kina Igman.

Nagradu za najbolji dugometražni film osvojio je "I have electric dreams", dok je odlukom žirija za najbolji kratki film proglašen "Tria". Specijalnu nagradu u programu dugometražnog filma dobio je "EO", dok je specijalno priznanje u kategoriji kratkog filma pripalo ostvarenju "The Other".

Nagradu Best new apperance i prsten festivala dobio je mladi italijanski glumac Mattia Carrano.

Na ovogodišnjem OFF-u prikazan je rekordan broj filmova - 59, uz više stotina gostiju iz 14 zemalja, čime je još jednom pokazao da je najveći festival omladinskog filma u Jugoistočnoj Evropi.

Općina Ilidža je i ove godine prepoznala Omladinski filmski festival kao projekt koji okuplja mlade i bila je institucionalna podrška njegovom jubilarom 15. izdanju, a na Ljetnoj pozornici su nakon svake od filmskih projekcija organizovane zabave za sve posjetioce.

U znak obilježavanja Kurban-bajrama



Na obnovljenom Centralnom trgu

DANI BAJRAMSKE RADOŠTI ODRŽANI U CENTRU ILIDŽE

U znak obilježavanja Kurban-bajrama Medžlis Islamske zajednice (MIZ) Sarajevo realizovao je manifestaciju "Dani bajramske radosti", a dio programa održao se i na Ilidži.

Nakon što su prve bajramske noći održani koncerti duhovne muzike na Baščaršiji i u Vogošći, drugu noć Kurban-bajrama, uz koncert na Baščaršiji, održan je i prigodan program za najmlađe na Ilidži u kojem su nastupili Latif i Mravko Travko.

Treće bajramske noći na obnovljenom Centralnom trgu održan je još jedan koncert na kojem su nastupili Eldin Huseinbegović, Mustafa Isaković, Selma Droce, Šaha Jelačić, hafiz Aziz Alili, Mirza Ganić, Ibrahim Bilčević i hor Medžlis Islamske zajednice Sarajevo.

Iz Medžlisa Islamske zajednice Sarajevo poručili su kako kroz ovakve programe, u čijoj organizaciji je učestvovala i Općina Ilidža, žele ukrasiti blagoslovljeno vrijeme građanima Sarajeva i mnogobrojnim gostima i turistima, ali i istaknuti vjerske, kulturne i tradicijske vrijednosti praznika.

Obnovljeni Centralni trg sigurno će u budućnosti biti domaćin brojnim sličnim manifestacijama i događajima.

Zdravstveni savjet općine Ilidža i Crveni križ

AKCIJA DARIVANJA KRVI DALA ODLIČAN REZULTAT

Povodom Svjetskog dana dobrovoljnih darivatelja krvi Zdravstveni savjet općine Ilidža u saradnji s Crvenim križom općine Ilidža organizovao je akciju dobrovoljnog darivanja krvi, a kojem je partner bila i Općina Ilidža.

Bila je ovo odlična prilika da se ukaže na značaj i važnost darivanja krvi te da se kroz organizaciju akcije dobrovoljnog darivanja učestvuje u humanoj misiji koja pomaže spašavanju ljudskih života.

Tokom ove akcije prijavljeno je 86 dobrovoljnih darivatelja, a uspješno je prikupljeno 69 doza krvi.

Koristimo i ovu priliku da uputimo riječi zahvalnosti svim građanima Ilidže koji su se u velikom broju odazvali ovoj akciji i da kao Općina odamo priznanje svim darivateljima krvi. Svakom od njih Općina Ilidža i hotel Hills dodjeli su cjelodnevne karte za bazen Termalne rivijere Ilidža, što je tek mali znak pažnje za njihovu veliku humanost.

Vjerujemo da će biti prilike da i u budućnosti budemo inicijatori sličnih događaja, a ovo je samo jedan od načina na koji Općina Ilidža doprinosi našoj široj zajednici.



Prikupljeno 69 doza krvi

Obilježavanju 28. godišnjice genocida nad Bošnjacima u Srebrenici prisustvovala i delegacija Općine Ilidža

KLANJANA DŽENAZA I OBAVLJEN UKOP ZA 30 ŽRTAVA GENOCIDA U SREBRENICI



Počast mučki ubijenim Srebreničanima "zaštićene zone UN-a" odao je i načelnik Općine Ilidža

U mezarju Memorijalnog centra Srebrenica - Potočari klanjana je dženaza-namaz i obavljen ukop 30 žrtava genocida počinjenog u ljeto 1995. godine u Srebrenici.

Obilježavanju 28. godišnjice genocida nad Bošnjacima u Srebrenici prisustvovala su brojne delegacije iz regiona, Evrope i svijeta. Počast mučki ubijenim Srebreničanima "zaštićene zone UN-a" odao je i načelnik Općine Ilidža Nermin Muzur, kao i dopredsjedavajući OV Ilidža, Selver Zećirović i Amar Bungur. Počast žrtvama odali su i članovi Predsjedništva BiH Denis Bećirović i Željko Komšić, predsjedavajuća Vijeća ministara BiH Borjana Krišto, ministar odbrane BiH Zukan Helez, ministar vanjskih poslova Elmedin Konaković i premijer FBiH Nermin Nikšić kao i premijer Crne Gore Dritan Abazović.

Na vječni počinak ispraćeno je 30 žrtava genocida: Alić (Omer) Džemail, rođen 1962., Aljić (Zildžija) Mevlid, rođen 1957., Avdić

(Mujo) Halil, rođen 1975., Džanić (Tajib) Esad, rođen 1968., Đozić (Edhem) Semir, rođen 1977., Esmić (Meho) Mujo, rođen 1940., Garaljević (Mehmed) Sakib; rođen 1971., Gerović (Mahmut) Mehmed, rođen 1945., Halilović (Ahmet) Ahmedin, rođen 1976., Hodžić (Ismet) Senid, rođen 1975., Ibrahimović (Abid) Sabid, rođen 1974., Ibrahimović (Haso) Hasib, rođen 1946., Ibrić (Šemso) Šaban, rođen 1935., Jahić (Huso) Ređo, rođen 1935., Klempić (Alija) Esed, rođen 1979., Lemeš (Avdija) Zuhdija, rođen 1949., Mehinović (Ibro) Idriz, rođen 1950., Mekanić (Junuz) Mustafa, rođen 1979., Mujanović (Šećan) Vejsil, rođen 1943., Mujanović (Vejsil) Hasib, rođen 1965., Mujić (Idriz) Himzo, rođen 1959., Muminović (Mumin) Nezir, rođen 1930., Musić (Demir) Bekir, rođen 1972., Riđić (Šaćir) Ekber, rođen 1972., Salčinović (Turabija) Elvir, rođen 1980., Selimović (Bajro) Sabahudin, rođen 1964., Selimović (Ševko) Nisad, rođen 1976., Smajlović (Omer) Hasan, rođen 1959., Tabaković (Hajro) Rifet, rođen 1966., Zukić (Ibrahim) Husein, rođen 1932.

12. Međunarodni moto maraton ove godine održao se pod sloganom "Da se ne zaboravi i ne ponovi"

BAJKERI VOZILI OD ILIDŽE DO SREBRENICE

Više stotina učesnika 12. Međunarodnog moto maratona Srebrenica koji se i ove godine održao pod sloganom "Da se ne zaboravi i ne ponovi", s Ilidže su krenuli ka Potočarima.

U dugačkoj koloni, koja se kretala uz policijsku pratnju, bili su motoristi iz Bosne i Hercegovine, iz zemalja regiona ali i drugih evropskih država.

Prije nego je počeo defile motorista kroz Sarajevo učesnicima moto maratona obratio se i načelnik Općine Ilidža Nermin Muzur, te im zaželio sretan put.

Osim toga načelnik Muzur se bajkerima zahvalio što iz godine u godinu odaju počast svim ubijenim u genocidu koji se desio 11. jula 1995. godine.



Dio kolone koja je krenula s Ilidže ka Potočarima



Nakon osvojenog srebra na Svjetskom prvenstvu



Pehlivanović u razgovoru s načelnikom Muzur

SANJIN PEHLIVANOVIĆ U POSJETI OPĆINI ILIDŽA

Najbolji bh. igrač bilijara Sanjin Pehlivanović posjetio je Općinu Ilidža i načelnika Nermina Muzura, nakon što je u disciplini "osam" postao viceprvak svijeta

Pehlivanović je dugi niz godina neosporni vladar svjetske bilijar scene. Na svim velikim takmičenjima na kojima se pojavio, Sanjin je ostvarivao zapažene rezultate. Prošle godine postao je evropski prvak u disciplini "desetka".

Uprkos impresivnom nizu pobjeda, u finalu Svjetskog prvenstva, u kojem je igrao protiv legendarnog Amerikanca Shanea Van Boeninga doživio je poraz. Može se reći da je jedan potez na kraju odlučio pobjednika.

- Plasirati se u finale Svjetskog prvenstva u bilijaru nije mala stvar, a to je dokaz Sanjinove izvanredne vještine i predanosti. Siguran sam da ćemo ga u budućnosti vidjeti na vrhu pobjedničkog postolja. Njegovo dostignuće inspiše sve nas da težimo vrhunskim postignućima u svim sferama života - poručio je načelnik Muzur.

Ime Sanjina Pehlivanovića postalo je sinonim za izvanrednu tehniku, koncentraciju i strast prema ovom refinjenom sportu.

Načelnik Općine Ilidža Nermin Muzur ugostio rukovodstvo bosanskohercegovačkog fudbalskog velikana

PRIJEM ZA DELEGACIJU FK ŽELJEZNIČAR



Rukovodstvo kluba s Grbavice u društvu načelnika

Načelnik Općine Ilidža Nermin Muzur ugostio je delegaciju Fudbalskog kluba Željezničar predvođenu predsjednikom Upravnog odbora Edisom Kovačevićem.

Učesnici sastanka razgovarali su o planovima za budućnost,

U Hrasnici održan Memorijalni turnir "Četvrta viteška"

POBJEDNIČKI PEHAR ZA FUDBALERE RADNIKA

Fudbaleri Radnika iz Hadžića osvojili su ovogodišnji Memorijalni turnir Četvrta viteška motorizovana brigada nakon što su u finalu s 3:1 savladali sastav Famosa.

U utakmici za treće mjesto ilidžanski Igman je slavio uvjerljivu pobjedu nad ekipom Rudara iz Breze, a rezultat je na kraju susreta glasio 4:0 u korist kluba sa Ilidže.

Za najboljeg igrača turnira proglašen je fudbaler Radnika Amar Sabljica. Njegov klupski kolega Alija Jamaković ponio je priznanje za najboljeg golmana turnira, dok je napadaču Famosa Arminu Cibri pripala nagrada za najboljeg strijelca turnira.

Fudbalski klub Famos kao tehnički organizator turnira i Udruženje Četvrta viteška zahvalili su se svim timovima na učešću na dvodnevnom turniru koji je i ove godine podržala Općina Ilidža, a koji je svečano otvorio predsjedavajući Općinskog vijeća Ilidža Tarik Stambolić.

Organizatori su naglasili kako se iskreno nadaju da će već naredne godine, povodom 32. godišnjice brigade, turnir biti još bolji i kvalitetniji.



Hadžićani zaslužno stigli do trijumfa

mogućnosti eventualne saradnje ali i drugim temama koje su usko vezane za fudbal i sportsku problematiku.

Načelnik Muzur je svoje goste upoznao s projektima kojima je Općina Ilidža u proteklom periodu napravila značajne iskorake ka unaprjeđenju sportske infrastrukture, ali i sa onima koji su planirani u budućnosti. Naglašeno je i kako je Ilidži kao lokalnoj zajednici prevažno da su naša dva najveća sportska kolektiva iz godine u godinu sve bolji i konkurentniji, te da nas na pravi način predstavljaju u evropskim takmičenjima.

U prethodnom periodu, u skladu s mogućnostima, Općina Ilidža je pomagala naše fudbalske velikane.

- Kroz ovu vrstu sastanaka pokazali smo spremnost da saslušamo njihove prijedloge, ideje ali i probleme i izazove s kojima se svakodnevno susreću - kazao je načelnik Općine Ilidža Nermin Muzur.

Obilježeni važni datumi iz vremena agresije na Bosnu i Hercegovinu

KULTURA SJEĆANJA JOŠ ŽIVI NA NAŠOJ ILIDŽI

Sve važne događaje i datume koji su se tokom agresije na Bosnu i Hercegovinu odigrali na ilidžanskim prostorima Općina Ilidža nastoji obilježiti i na taj način sačuvati od zaborava.

Da kultura sjećanja i dalje živi na našoj Ilidži svjedoče i obilježavanja kroz koja se prisjećamo i civilnih žrtava koji su nastradali u agresorskim zločinima.

S ponosom se sjećamo brojnih akcija u kojima su najhrabrije

čerci i sinovi naše domovine dali svoje živote i ugradili dijelove svojih tijela u temelje naše slobode.

- Često stidljivo pričamo o ulozi i važnosti koju su slobodni ilidžanski prostori tokom agresije imali za Sarajevo i za opstanak Bosne i Hercegovine. Ma ko šta mislio, taj doprinos sigurno nije mali, niti je zanemariv - rekao je načelnik Općine Nermin Muzur, a kao argument za takvu tvrdnju iskoristio je važne objekte kao što su Tunnel spasa, Most spasa i Ratni put preko Igmana.



15.5.

SJEĆANJE NA ŽRTVE ZLOČINA U KASINDOLSKOJ

Odata počast građanima Kasindolske ulice, koji su početkom agresije na BiH odvedeni u logor Kula, potom svirepo ubijeni na Ravnoj Romaniji.



6.6.

"AKCIJA POKUŠAJ DEBLOKADE RAKOVICE"

Dan "Akcije pokušaj deblokade Rakovice" obilježava se i kao Dan Mjesne zajednice Rakovica.



13.6.

GODIŠNJICA ODBRANE DONJEG KOTORCA

Polanjanjem cvijeća i učenjem Fatihe obilježena je 31. godišnjica odbrane Donjeg Kotorca.



12.7.

SJEĆANJE NA ZLOČIN U HRASNIČKOM PARKU

Godišnjica zločina u parku u Hrasnici obilježena je na mjestu gdje je agresorska granata ubila četvero djece, a još četvero teško ranila.



27.7.

GODIŠNJICA ČETVORTE VITEŠKE MOT. BRIGADE

Svečanom sjednicom Općinskog vijeća Ilidža obilježena je 31. godišnjica formiranja Četvrte viteške motorizovane brigade.



4.8.

GODIŠNJICA BITKE ZA FAMOS

Godišnjica Bitke za Famos u kojoj je život za odbranu domovine položilo 26 pripadnika tada 104. motorizovane brigade ARBiH.



7.9.

GODIŠNJICA UBISTVA SESTARA RAHMAN

Zločinačka granata na spavanju je ubila 17-godišnju Jasnu i njenu tri godine mlađu sestru Samiru.



14.9.

GODIŠNJICA ODBRANE OTESA I STUPA

Obilježena 31. godišnjica borbe za odbranu Otesa, Dogloda, Azića, Stupa i Bara.



Kompanija Braća Mujić 99% svojih proizvoda izvozi na švicarsko i evropsko tržište



NA ILIDŽI OTVORENA NOVA POSLOVNA ZONA, NAČELNIK NERMIN MUZUR PRESJEKAO VRPCU

Nova poslovna zona kompanije Braće Mujić svečano je otvorena na Ilidži. Ceremoniji otvaranja prisustvovali su domaći privrednici, predstavnici kompanija i brojne zvanice. Otvaranje pogona za metalnu i građevinsku industriju koji je opremljen najmodernijom tehnologijom i visokokvalitetnim strojevima samo je jedna u nizu potvrda da se na Ilidži rađaju i uspješno realizuju poslovne ideje koje kreiraju nove poslovne prilike i nova radna mjesta.

Načelnik Općine Ilidža Nermin Muzur, koji je prisustvovao svečanom otvaranju, iskazao je zadovoljstvo povodom pokretanja novog pogona koji će biti prilika za nova zaposlenja.

- Otvaranje novog pogona kompanije Braće Mujić označava veliki korak u ekonomskom razvoju Ilidže i poklapa se s našim nastojanjima da od nje napravimo mjesto pogodno za razvijanje privrede. Braća Mujić nisu samo poslovni ljudi već su radom i predanošću postavili visoke standarde u poslovanju - istakao je

načelnik Muzur, koji je s direktorom kompanije Hasanom Mujićem presjekao vrpcu i tako svečano otvorio novi pogon.

Novootvoreni pogon smješten je u poslovnoj zoni kompanije Braća Mujić u Gladnom polju, koja se prostire na više od 70.000 kvadrata. Više od 300 radnika zaposleno je u ovoj poslovnoj zoni, dok je još njih 800 indirektno vezano za proizvodne pogone.

Iz kompanije Braća Mujić posebnu zahvalnost uputili su Općini Ilidža i načelniku Nerminu Muzuru, zbog odlične saradnje i profesionalnosti iskazane u realizaciji ovog poslovnog poduhvata kompanije koja 99% svojih proizvoda izvozi na švicarsko i evropsko tržište i nije konkurencija domaćim firmama.

Načelnik Muzur je s velikim pijetetom govorio o rahmetli Sajimu Mujiću, čovjeku koji je bio jedan od stubova kompanije Braća Mujić, a po kojem nova poslovna zona nosi ime.

Članovi SUFBiH organizirali zajednički sastanak s predstavnicima sindikata iz Republike Turske

TURSKI SINDIKATI U POSJETI OPĆINI ILIDŽA

Članovi Samostalnog sindikata državnih službenika i namještenika u organima državne službe, sudskoj vlasti i javnim ustanovama u FBiH predvođeni predsjednikom Samirom Kurtovićem posjetili su Općinu Ilidža sa kolegama iz tri turska sindikata, a koji zajedno djeluju.

Predstavnici Sindikata zaposlenih u općinskoj i privatnoj upravi (Bem-Bir-Sen Belediye Ve Ozel Idare Calisanlari Birligi Sendikasi), Sindikata javnih radova, građevinarstva i ruralnih usluga (Bayindir Memur-Sen Resmî Web Sayfasi) i Sindikata zaposlenih u poljoprivredi i šumarstvu (Toc Bir-Sen Tarim-Orman Birligi Calisanlari Sendikasi) naglasili su da u Bosni i Hercegovini vide velikog prijatelja, te da u budućnosti žele

unaprijediti odnose među sindikalnim organizacijama.

Predstavnici delegacije turskih sindikata Leventu Uslu, Soner Can Tapanoglu i Huseyin Ozturk su posebno poštovanje iskazali prema spasiocima iz Bosne i Hercegovine koji su bili angažovani nakon razornih zemljotresa koji su pogodili Tursku.

Svi učesnici sastanka složili su se da je produktivnim razgovorom otvoreno jedno novo poglavlje, uključujući i direktnu saradnju sindikata i lokalnih zajednica.

Načelnik Općine Ilidža, Nermin Muzur izrazio je zadovoljstvo zbog posjete i istakao spremnost za saradnju u budućnosti.



Radovi na poboljšanju sigurnosti svih učesnika u saobraćaja konstanta su na području Općine Ilidža

KROZ VIŠE OD 80 PROJEKATA UNAPRJEĐENA SAOBRAĆAJNA INFRASTRUKTURA



Obnovljen, izgrađen i asfaltiran veliki broj ulica ili njihovih dijelova

U 2023. godini Općina Ilidža je značajno unaprijedila saobraćajnu infrastrukturu. Kroz više od 80 realizovanih projekata obnovljen je, izgrađeno i asfaltirano 56 ulica ukupne dužine 10.000 metara. Na ovaj način poboljšana je sigurnost svih učesnika u saobraćaju.

Kroz saradnju sa savjetima mjesnih zajednica određeni su i prioriteta, a pojedine ulice obnovljene su prvi put nakon više od 40 godina. Jedna od njih je i Kakrinjski put u Mjesnoj zajednici Rakovica, čija je rekonstrukcija rađena prvi put nakon što je asfaltirana daleke 1981. godine. Ova saobraćajnica dobila je 830 metara novog asfalta, a pored nje asfaltirani su i dijelovi ulica Kobiljača, Šamin gaj i Stanjevac.

I u drugim dijelovima naše lokalne zajednice aktivno se radilo na unaprijeđenju putne infrastrukture. U Sokolović Koloniji obnovljeni su krakovi ulica Džananova, Nihadija i Huseina Đoze, dok su u

Hrasnici asfaltirani dijelovi ulica Izeta Nanića, Begluk, Stari drum i Igmanskih bataljona.

Značajan broj saobraćajnica ili njihovih krakova obnovljen je u mjesnim zajednicama Osjek (Mekote, Osik, Hendekuša, Tukovi), Blažuj (Stara pruga, Vidovci, Vlakovo, Rogačići, Plantaže), Stup (Azići, Uglješe Uzelca), Stup II (Džemala Bijedića, Kasindolska, Kurta Schorka), Ilidža Centar (Željeznička, dr. Fuada Muhića), Otes (Rahima Čatovića, Oteška), Butmir (Butmirska cesta) i Lužani (Karima Zaimovića).

Uz značajan broj asfaltiranih ulica uspješno je realizovana izgradnja i obnova devet pješačkih staza na nekoliko lokacija na području općine Ilidža. Izgrađena su i tri parkinga i jedan kružni tok, a u rekonstrukciju cestovne infrastrukture u protekloj godini Općina Ilidža uložila je više od 3,3 miliona KM. Za istu namjenu u 2024. godini planirano je šest miliona KM.

Članovi Plivačkog kluba Spid u društvu roditelja i trenera Amela Kape na prijemu kod načelnika Muzura

OPĆINA NAGRADILA BARLOVA I ZULFIĆA

Načelnik Općine Ilidža Nermin Muzur ugostio je članove PK Spid, Ismaila Barlova, Ismaila Zulfića i trenera Amela Kapu.

Na Svjetskom prvenstvu u paraplivanju koje je održano u Mančesteru, Barlov je osvojio sjajno četvrto mjesto u klasi SB2, u disciplini 50 metara prsno, a rezultat (1:08.77) bio je dovoljan 12-godišnjem Barlovu da osigura normu za nastup na Paraolimpijskim igrama u Parizu 2024. godine. Zapažen nastup na SP-u imao je i Ismail Zulfić. "Leptir bez krila" je u disciplini 50 metara delfin završio na devetom mjestu.

- Zahvaljujemo se načelniku Muzuru što je nagradio vrhunske rezultate. Sport je pravo svakog čovjeka, a Ismail Barlov je dijete s Ilidže, a napravio je svjetski rezultat. Sa 12 godina ima dvije A norme za Paraolimpijske - poručio je trener PK Spid, Amel Kapa.



Načelnik sa članovima i trenerom PK Spid



Kroz projekt nužnih opravki Općina je ove godine radila na obnovi objekata kolektivnog stanovanja

ZGRADE U CENTRU DOBILE NOVE KROVOVE



Zgrada u ulici Edhema Eke Džubura

Kroz projekt nužnih opravki Općina Ilidža je ove godine radila na obnovi dotrajalih krovova na objektima kolektivnog stanovanja, a koji se u prethodnom periodu pokazao kao itekako potreban i opravdan. U nepune tri godine na području Ilidže ukupno 22 objekta dobila su novi krov ili su utopljeni novom fasadom.

Među objektima na kojima je obnovljen krov je i stambena zgrada u ulici Edhema Eke Džubura na brojevima 29, 31 i 33. Ovo nije prva zgrada na području Mjesne zajednice Ilidža Centar koja je dobila novi krov, s obzirom na to da je prethodno uspješno saniran krov zgrade u ulici Abdulaha Efendije Kantamirije 4.

- Rekonstrukcija krovova na objektima kolektivnog stanovanja jedan je od stalnih projekata Općine Ilidža, a koji se direktno odražava na kvalitet života naših sugrađana - kazao je načelnik Općine Ilidža, Nermin Muzur.

Kroz projekt nužnih opravki u 2022. godini četiri objekta kolektivnog stanovanja dobila su novi krov, dok su u 2023. godini, pored dvije zgrade u MZ Centar, krovovi obnovljeni i na zgradama u ulici Sabita Užičanina na brojevima 8, 10, 12, 20 i 22.

- Zaista činimo sve da našu Ilidžu učinimo ljepšom, a život njenih stanovnika ugodnijim - naglasio je načelnik Muzur.

Sastanak načelnika i ministra unutrašnjih poslova KS



Učesnici sastanka obišli potencijalne lokacije

PLANOVI ZA NOVU ZGRADU POLICIJSKE UPRAVE ILIDŽA

Ubrzani razvoj općine Ilidže kao lokalne zajednice, koji je evidentan u svim sferama života, znači da bi u budućnosti trebali dodatnu pažnju posvetiti aspektu sigurnosti.

Izgradnja moderne zgrade Policijske uprave Ilidža zasigurno je jedan od preduslova za daljnji razvoj općine Ilidža, ali i poboljšanja sigurnosti njenih građana.

Na sastanku s ministrom unutrašnjih poslova Kantona Sarajevo Admirom Katicom i direktoricom Zavoda za izgradnju Kantona Sarajevo Belmom Barlov, načelnik Općine Ilidža Nermin Muzur razgovarao je o mogućnostima izgradnje nove zgrade Policijske uprave, s obzirom na to da je općina Ilidža sve atraktivnija za porodice i mlade, a uz to je porast stanovnika konstantan.

- Zaključili smo da je vrijeme da općina Ilidža dobije novu, moderno opremljenu, kapacitiranu zgradu i kompleks Policijske uprave Ilidža. Na naše veliko zadovoljstvo iskazali smo spremnost da doprinesemo inicijativi, ali i realizaciji ovog velikog projekta - rekao je načelnik Muzur.

Svi sudionici sastanka posjetili su i potencijalne lokacije za buduću novu zgradu Policijske uprave Ilidža.

Ministar kulture i sporta KS u posjeti Općini Ilidža

KONCERTNA DVORANA U SOKOLOVIĆ KOLONIJI

Dobra saradnja koju je Općina Ilidža imala s Ministarstvom kulture i sporta, koje je u ranijem mandatu predvodio Samir Avdić, bit će nastavljena i u budućnosti s novim resornim ministrom Kenanom Magodom.

Nakon sastanka s načelnikom Općine Ilidža ministar Magoda naglasio je da ga raduje činjenica da načelnik Muzur već ima spremne projekte, te će oni biti razmotreni, kako bi se sagledala mogućnost zajedničke realizacije.

- Općina Ilidža postaje veliko gradilište, koje se veže za sportsku infrastrukturu i kulturu. Dopao mi se projekt koncertne, odnosno multifunkcionalne dvorane u Sokolović Koloniji. U prilog ovoj ideji ide i činjenica da ćemo u budućnosti imati tramvajsku liniju koja će ići do Hrasnice. Kao ministar, s kompletnom Vladom, nastojat ću da krenemo u realizaciju tog velikog infrastrukturnog projekta jer Sarajevo godinama vapi za takvom dvoranom - naveo je Magoda, te naglasio da neće izostati podrška Ministarstva ni kod organizacije manifestacija.

Zahvalivši ministru na posjeti, načelnik Muzur je rekao da je odmah dolaskom na funkciju počeo pripremu brojnih projekata kako bi oni što prije bili spremni za realizaciju.



Projekt multifunkcionalne dvorane zanimljiv ministru Magodi

Dio najvećeg evropskog automobilskeg koncerna odabrao Ilidžu za svoje sjedište



Alex Vaszi (drugi s lijeva), izvršni direktor kompanije Porsche Immobilien

DELEGACIJA OPĆINE ILIDŽA U POSJETI NOVOM PRODAJNO-SERVISNOM CENTRU PORSCHEA

Delegacija Općine Ilidža predvođena načelnikom Nerminom Muzurom posjetila je prodajno-servisni centar kompanije Porsche Holding u Blažuju, i to nakon poziva Alexa Vaszija, izvršnog direktora kompanije Porsche Immobilien.

Načelnik Muzur istakao je zadovoljstvo zbog dinamike kojom se odvijaju radovi na izgradnji prodajno servisnog centra u kojem će biti smješteni izložbeno-prodajni saloni za sve brendove, servisne radionice, nova lakirница i maloprodajna administracija.

- Izuzetno smo ponosni što je kompanija Porsche Holding iz Salzburga, kao dio najvećeg evropskog automobilskeg koncerna, Ilidžu odabrala za svoje sjedište. To je dokaz pozitivnih trendova kada je riječ o radu administracije Općine Ilidža i želje da našu lokalnu zajednicu učinimo primamljivom i zanimljivom velikim svjetskim kompanijama kakva Porsche Holding sigurno jeste. Od prvog dana nastojali smo kroz izuzetno korektno i konkretne sastanke s predstavnicima Porsche Holdinga, a svjesni važnosti

ovog velikog projekta i investicije, biti na usluzi investitoru i u što kraćem roku odgovoriti na sve zahtjeve koji su rezultirali izgradnjom ovog centra. Vjerujem da će novi renomirani objekt biti prilika za zaposlenje lokalnog stanovništva - kazao je Muzur.

Novi objekat smješten je na području općine Ilidža, s dobrim pristupnim putevima, uključujući izlaz na magistralni put M17. Nakon završetka radova, novi prodajno-servisni centar će imati površinu od 5.611 kvadratnih metara, a prostire se na zemljištu površine 23.598 kvadratnih metara. U narednim godinama planirano je proširenje objekta i otvaranje novih radnih mjesta.

- Ponosni smo na naš prodajno-servisni centar. Novi objekt će biti jedan od najvećih, a sasvim sigurno najsavremeniji takve vrste u ovom dijelu Evrope, usklađen sa vodećim ekološkim i sigurnosnim standardima - rekao je Alex Vaszi, izvršni direktor kompanije Porsche Immobilien, koji se zahvalio načelniku Muzuru na izvanrednoj saradnji.

Besplatno izrađen idejni i glavni projekt tribine s pratećim sadržajima u Sportskom centru Hrasnica

POKLON KOMPANIJE DULJEVIĆ ZA OPĆINU



Direktor kompanije Duljević u razgovoru s načelnikom

Potez kompanije Duljević d.o.o, koja je Općini Ilidža besplatno izradila idejni i glavni projekt tribine s pratećim sadržajima u Sportskom centru Hrasnica, potvrda je izuzetnih odnosa s Općine s ilidžanskim privrednicima. Načelnik Općine Ilidža Nermin Muzur zahvalio se direktoru kompanije Haki Duljeviću na ovoj gesti, te naglasio da se nada da će potez njegove kompanije, kao društveno odgovorne, biti jedan od primjera uspješne saradnje Općine i njenih privrednika.

- Neka ovo bude još jedan pozitivan događaj na Ilidži u vihoru ostalih divnih manifestacija i projekata koje sprovodi općinska uprava predvođena načelnikom Nerminom Muzurom - kazao je Hako Duljević, direktor kompanije Duljević d.o.o.



Obilježena 20. godišnjica otvaranja spomen-obilježja i mezarja za žrtve genocida iz 1995. godine

OPĆINA ILIDŽA NASTAVLJA PODRŽAVATI RAD MEMORIJALNOG CENTRA SREBRENICA



Kontinuirana podrška radu MC Srebrenica - Potočari

Načelnik Općine Ilidža, Nermin Muzur, prisustvovao je obilježavanju 20. godišnjice od zvaničnog otvaranja Memorijalnog centra Srebrenica - Potočari spomen-obilježja i mezarja za žrtve genocida iz 1995. godine.

Prije okupljanja na mezarju Memorijalnog centra načelnik Muzur posjetio je direktora Memorijalnog centra Emira Suljagića te sa

predsjednikom UO Memorijalnog centra Hamdijom Fejzićem potpisao sporazum kojim je Općina Ilidža sa 25.000 KM podržala rad MC Srebrenica - Potočari.

- Podrška radu MC Srebrenica - Potočari obaveza je svih nas i s ponosom mogu reći da je ona stalna stavka u Budžetu Općine Ilidža - kazao je Nermin Muzur, načelnik Općine Ilidža koja je u posljednje tri godine rad Memorijalnog centra podržala s ukupno 100.000 KM.

Načelnik je prilikom posjete Srebrenici naglasio da je posao koji rade uposlenici Memorijalnog centra izuzetno važan za očuvanje kulture sjećanja na genocid koji je sredinom 1995. godine počinjen u Srebrenici nad bošnjačkim narodom.

- Srebrenica mora biti važna svima nama. O njoj, ali i o drugim mjestima na kojima se desio genocid, moramo pričati i brinuti svakodnevno - naglasio je načelnik Muzur, koji je polaganjem cvijeća i učenjem Fatihe odao počast žrtvama genocida.

Osim finansijske podrške Općina Ilidža godinama unazad, u saradnji s ilidžanskim osnovnim školama, organizuje posjete Memorijalnom centru, a do ove godine više od 10.000 učenika i nastavnika posjetilo je Potočare.

Ministrica za rad, socijalnu politiku, raseljena lica i izbjeglice KS Enda Pavić Pečenković posjetila Općinu

POHVALA ZA OBLAST SOCIJALNE POLITIKE

Načelnik Općine Ilidža Nermin Muzur održao je radni sastanak sa ministricom za rad, socijalnu politiku, raseljena lica i izbjeglice Kantona Sarajevo Endom Pavić Pečenković.

Sastanak je upriličen kako bi se iznašli modaliteti zahvaljujući kojima bi se poboljšao kvalitet života naših sugrađana, pogotovo onih najranjivijih kategorija stanovništva, s obzirom na to da je saradnja resornog ministarstva, Vlade KS i Općine Ilidža u proteklom periodu dala jako dobre rezultate.

Načelnik Nermin Muzur naglasio je kako Općina Ilidža nastoji biti primjer u svim sferama društva, a posebno kada je riječ o

pitanjima koja tretiraju oblast socijalne politike, koja je izuzetno osjetljiva i kojoj je neophodno pristupati s velikom pažnjom.

- S posebnom empatijom tretiramo sva pitanja koja su iz djelokruga Ministarstva za rad, socijalnu politiku, raseljena lica i izbjeglice KS, kao i sve socijalno osjetljive kategorije društva - kazao je Muzur, naglasivši i da je Budžet Općine Ilidža socijalno-razvojnog karaktera, što je jako bitno.

Resorna ministrica rekla je da prati pozitivna dešavanja iz oblasti socijalne politike na području općine Ilidža, ali je pohvalila i druge projekte koji se odražavaju na kvalitet života građana.

Povezivanje s maticom u Bosni i Hercegovini i Sandžaku kroz zajedničke projekte, investiranja i razmjenu ideja

SASTANAK S UNIJOM BOŠNJAKA DIJASPORE



Načelnik Muzur domaćin gostima iz Njemačke

U posjeti Općini Ilidža boravila je Unija Bošnjaka dijaspore iz Njemačke predvođena predsjednicom Mirsadom Gudić i članovima Upravnog odbora Miljhatom Muslićem, Mithatom Bečirevićem, Hazbom Hajradinovićem i Editom Turković, vijećnicom OV Ilidža, ali i koordinatorom UBD za BiH i Sandžak.

Predstavnici Unije prezentovali su načelniku Općine Ilidža Nerminu Muzuru dosadašnji rad kao i buduće planove te su razmijenjena iskustva i otvoreni razgovori o zajedničkoj saradnji.

Cilj Unije je ujedinjenje bošnjačke dijaspore, njegovanje i osnaživanje bošnjačkog nacionalnog identiteta kroz različite programske aktivnosti, te povezivanje s maticom u Bosni i Hercegovini i Sandžaku kroz zajedničke projekte, investiranja i razmjenu dobrih praksi i iskustva.



Nakon obnove premjera aviosnimanjem Općina Ilidža u upotrebu stavila novu bazu podataka za K.O. Vlakovo

PRVI REZULTATI HISTORIJSKOG PROJEKTA



Katastarska općina Vlakovo

Poslije niza sprovedenih aktivnosti na realizaciji historijskog projekta Općine Ilidža, 27. jula ove godine u potpunosti je okončan postupak obnove premjera za katastarsku općinu Vlakovo, a već 12. septembra u upotrebu je stavljena nova baza podataka.

Počeli radovi na višedecenijskom projektu za Ilidžu



Dužina pruge bit će 13 kilometara

TRAMVAJSKA PRUGA ZA HRASNICU NIJE VIŠE SAN

Nakon višedecenijskih priča o tramvajskoj pruzi od Ilidže do Hrasnice, počeli su radovi na njenoj izgradnji.

Prvi put ovaj historijski projekt se u planovima spominjao u godinama prije održavanja Zimskih olimpijskih igara u Sarajevu 1984. godine.

- Zadnje proširenje odnosno gradnja nove pruge bila je između 1958. i 1962. godine od Čengić Vile do Ilidže, i evo mi smo tu 2023. godine da implementiramo i krećemo u historijski projekat koji se spominjao u planovima razvoja grada Sarajeva 80-tih godina - rekao je Adnan Šteta, ministar saobraćaja Kantona Sarajevo.

Dužina pruge bit će 13 kilometara. Na njenoj trasi nalazit će se dvije okretaljke, na Ilidži i u Hrasnici, te 20 modernih stajališta.

Rok za izgradnju nove tramvajске pruge od Ilidže do Hrasnice je 18 mjeseci, tačnije 540 dana.

Ovo je još jedan projekt u Kantonu Sarajevo koji se provodi u skladu s pravilima i procedurama EBRD-a, od koje su osigurana kreditna sredstva za realizaciju ovog projekta

Na ovaj način Općina Ilidža sprovodi projekt, po okončanju kojeg želi postati jedna od najsređenijih općina u FBiH u ovoj oblasti, a što će se ogledati u tome da će podaci o nekretninama biti usaglašeni u katastru i gruntu, digitalizovani i lako dostupni svima.

Zahtjevan proces obnove podataka počeo je na inicijativu načelnika Općine Ilidža Nermina Muzura, a avionsko snimanje startalo je krajem 2021. godine, ubrzo nakon potpisivanja ugovora s Federalnom upravom za geodetske i imovinsko pravne poslove Federacije BiH.

U podmakloj fazi realizacije su još četiri katastarske općine. Avionsko snimanje K.O. Osjek i K.O. Blažuj već je izvršeno, a u toku je snimanje katastarskih općina Butmir i Hrasnica.

Ažuriranjem upisa nekretnina u zemljišnoj knjizi građanima će biti dostupan puni garantovani obim i sadržaj vlasničkih prava, a što podrazumijeva sve one benefite koje nudi garancija vlasništva.

Prva faza projekta obnove ulazi u završnicu

U BUTMIRU NASTAVLJENI RADOVI NA KANALIZACIJI

Izgradnja separate kanalizacione mreže u naselju Butmir je nastavljena, a radovi na ovom infrastrukturnom projektu su se s lijeve "preselili" na desnu obalu rijeke Tilave.

Istovremeno se radi na više lokacija na trasi koja uključuje prvu fazu obnove kanalizacione mreže, a koja je u Butmiru izgrađena sada već daleke 1983. godine. Od tada do danas broj stanovnika ovog naselja itekako se povećao, a postojeća kanalizaciona mreža uveliko je dotrajala.

Upravo iz tog razloga jedan od prioriteta za Mjesnu zajednicu Butmir i njeno stanovništvo bila je obnova kanalizacije.

Kroz prvu fazu radova bit će izgrađeno 1.041 metara kanalizacije za fekalne i 1.354 metara za oborinske vode, a ukupna vrijednost projekta premašuje 1,5 miliona KM.

Projekti na rekonstrukciji i izgradnji vodovodne i kanalizacione mreže visoko su na listi prioriteta Općine Ilidža. Što potvrđuje i izgradnja kanalizacione mreže u ulici Hendekuša (MZ Osjek), izgradnja glavnog kanalizacionog kolektora (MZ Rakovica) te izgradnja pumpne stanice (MZ Blažuj).



Vrijednost projekta premašuje 1,5 miliona KM



Ilidžanska kompanijom ANS Drive radit će na kapitalnom projektu vrijednom blizu osam miliona KM

POTPISAN NAJVEĆI UGOVOR U HISTORIJI OPĆINE ILIDŽA, USKORO POČINJE GRADNJA NOVE SPORTSKE DVORANE U HRASNICI



Detalj s potpisa ugovora

Nakon niza aktivnosti na realizaciji jednog od najvećih kapitalnih projekata u historiji Općine Ilidža, potpisan je ugovor s ilidžanskom kompanijom ANS Drive, izvođačem radova na izgradnji buduće moderne sportske dvorane u Hrasnici.

Na zadovoljstvo svih onih koji vole sport na Ilidži, a u korist onih najmlađih, ali i naših sportskih kolektiva, Ilidža će dobiti novu modernu sportsku infrastrukturu.

Prije nešto više od godinu općinski načelnik Nermin Muzur najavio je da dvorana postaje realnost, a sada je to i potvrđeno.

- Modernim izgledom sportska dvorana u Hrasnici će definitivno unaprijediti kompleks oko stadiona Famosa, koji je posljednjih godina bio prilično zapušten i u lošem stanju. Prvi korak ka poboljšanju njegovog izgleda načinjen je izgradnjom terena sa umjetnom travom. Nadam se da će u novoj dvorani, stasati neke nove vedete i sportske veličine poput našeg Sabita Hadžića - kazao je načelnik Nermin Muzur nakon potpisa najvećeg ugovora u historiji Općine Ilidža.

Nova sportska dvorana, čija će izgradnja koštati blizu osam miliona konvertibilnih maraka, imat će kapacitet 1.000 sjedećih mjesta, a u njoj će se moći igrati međunarodne odbojkaške utakmice, ali i košarkaški i rukometni mečevi domaćih prvenstava.

Uz redovna čišćenja svih vodotoka na području Ilidže, kao i regulaciju rijeka prve kategorije

NOVO MJERNO MJESTO NA OBALI BOSNE

Preventivno djelovanje izuzetno je važno, zbog čega mu Općina Ilidža posvećuje posebnu pažnju, pogotovo kada je riječ o vodotocima na području naše lokalne zajednice. Velike poplave koje su pogodile pojedine dijelove naše općine u novembru 2021. godine služe nam kao upozorenje da opreza nikada nije dovoljno.

Zbog toga, uz redovna održavanja i čišćenja svih vodotoka na području Ilidže, kao i regulaciju rijeka prve kategorije (Bosna i Željeznica), nastojimo i kroz instalaciju mjernih mjesta biti spremni da pravovremeno reagujemo ali i da imamo blagovremena upozorenja s terena u slučaju ubrzanog rasta vodostaja.



Mjerno mjesto na rijeci Bosni (MZ Osjek)

Najnovije mjesto instalirano je na području Mjesne zajednice Osjek, na lijevoj obali rijeke Bosne.

Prije nešto više od dvije godine završeni su radovi na izgradnji isključne trake u naselju Osjek

BRZA CESTA DOBIJA I UKLJUČNU TRAKU



Unaprjeđenje saobraćajne infrastrukture

Početak radova na izgradnji nove uključne trake na granici mjesnih zajednica Vrelo Bosne i Osjek predstavlja važan korak za unaprjeđenje saobraćajne infrastrukture na području općine Ilidža.

Prije više od dvije godine u promet je puštena isključna traka s brze ceste prema Blažuju, u dužini 650 metara, što je bio izuzetno značajan projekat za Ilidžu, a pogotovo za stanovnike Osjeka.

- Kroz odličnu saradnju s Vladom KS, Ministarstvom saobraćaja KS i Direkcijom za puteve u proteklom periodu realizovani su ili su u procesu realizacije izuzetno važni projekti, a iskreno vjerujem da će i ovaj biti jednako uspješan - istakao je Muzur.

Načelnik Muzur je ukazao i na važnost gradnje uključne trake, a sve kako bi se smanjile saobraćajne gužve kroz centar Ilidže.



U obnovljenom Velikom parku na Ilidži



I ove sezone Ilidžanci imaju priliku uživati u klizanju

POČELA ZIMSKA ČAROLIJA I SEZONA KLIZANJA

Ledena ploha postavljena u Velikom parku na Ilidži, otvorena je 23. decembra uz veliki broj malih i velikih klizača. Veselje je to za sve ljubitelje zimskih sportova, a novi prostor klizališta dobio je sve pohvale klizača. Velika ledena ploha na otvorenom i specifične svjetlosne dekoracije "namamile" su brojne građane.

- Ilidža živi svoju prazničnu bajku. Na radost svih ljubitelja klizanja na Ilidži ponovo uživamo u zimskim čarima. Najmlađi Ilidžanci nisu krili radost i uzbuđenje zbog sadržaja u kojem će uživati. Svi su dobrodošli - rekao je Nermin Muzur, načelnik Općine Ilidža, uz želje da sezona na ledu prođe bez povreda.

S obzirom na činjenicu da je Veliki park uspješno obnovljen, ambijent za klizanje poprimio je jednu posve novu dimenziju, pogotovo u noćnim satima.

I ove godine Općina Ilidža i JP Ilidža su odlučili da cijene za korištenje leda i klizaljki, za sve one koji ih nemaju, budu simboličnog iznosa, a kako bi svi mogli biti dio Zimske čarolije. Korištenje ledene plohe i iznajmljivanje klizaljki u trajanju od 45 minuta i ove zime košta dvije konvertibilne marke, dok će svi posjetioci koji dođu s vlastitim klizaljka 45 minuta na ledu platiti 1 KM.

Ivona Čurić i Dylan Rajić na prijemu u Općini Ilidža nakon sjajnih rezultata u svojim sportovima

NAČELNIK UGOSTIO VRHUNSKJE SPORTISTE



Ivona Čurić u društvu načelnika Muzura

Uvijek je posebno zadovoljstvo ugostiti one koji se dokazuju kao vrhunski sportisti. Jedna od njih je Ivona Čurić, Ilidžanka, viceprvakinja svijeta u latinoameričkim plesovima.

Prošlu godinu Ivona je završila na prvom mjestu WDSF svjetske

Ulaganje u obnovu sportske infrastrukture

NOVI SPORTSKI TERENI U CENTRU I NA STOJČEVCU

Revitalizacija izletišta Stojčevac, koja je startala s početkom 2022. godine, još traje. To potvrđuju i novi sadržaji na popularnom izletištu. Nakon što su izgrađena dva terena za basket, na mjestu gdje su se prije agresije na Bosnu i Hercegovinu nalazile sportske plohe, postavljen je i teren za mali fudbal s umjetnom travom.

Novi sadržaji na Stojčevcu otvaraju i mogućnosti za održavanje novih manifestacija, ali i povratak nekih starih u punom obimu. Jedna od njih je svakako i memorijalni turnir u spomen na bosanske šehide, Nedžada Granula i Harisa Opankovića, koji su živote položili upravo u odbrani Stojčevca.

- Izgradnjom terena za mali fudbal stvorili smo sve predušlove da ove godine na Stojčevcu vratimo Memorijalni turnir u malom fudbalu Haris i Gigi - rekao je načelnik Općine Ilidža Nermin Muzur.

Baš kao i na Stojčevcu, kompletirano je postavljanje umjetne podloge na terenu za mali fudbal u centru Ilidže, a kojim upravlja JU KSiRC Ilidža. Novootvoreni tereni otvaraju i mogućnosti za održavanje novih manifestacija na području općine Ilidža.



Teren na Stojčevcu



Teren u centru Ilidže

rang-liste najboljih plesačica svijeta. Da je u odličnoj formi potvrdili su i najnoviji rezultati sa međunarodnih takmičenja u Sjevernoj Makedoniji i Irskoj, gdje je u izuzetno jakoj konkurenciji osvojila prva mjesta.

Nakon osvojene bronzane medalje na Evropskom prvenstvu do 22 godine i bh. bokser Dylan Rajić posjetio je načelnika Općine Ilidža Nermina Muzura.

- Osim bokserkih vještina koje svakodnevno pokazuje pod trenerskom palicom Almedina Fetahovića, krasi ga i ljudske vrline uzornog sportiste i primjer je mladim ljudima na svakom mjestu i u svakom trenutku - rekao je načelnik.

Rajić je mogao birati između nastupa za Nizozemsku i Hrvatsku, ali je srce željelo samo jedno - da se bori pod zastavom Bosne i Hercegovine. Poput pravog šampiona, ne manjka mu hrabrosti ni da otvoreno govori o najvećim željama.



Na 29. redovnoj sjednici Općinskog vijeća Ilidža

USVOJEN REKORDAN BUDŽET OPĆINE ILIDŽA ZA 2024. U IZNOSU 60.912.000 KM



60% sredstava u Budžetu namijenjeno kapitalne za projekte

Na 29. redovnoj sjednici Općinskog vijeća Ilidža, koja je održana u Multifunkcionalnoj sali, usvojen je Budžet Općine Ilidža za 2024. godinu u iznosu 60.912.000 KM, a nakon čega je usvojena i Odluka o izvršavanju Budžeta Općine Ilidža za 2024.

Zahvaljujući predanom radu načelnika Nermina Muzura, Općinskog vijeća Ilidža kao i administracije, Općina Ilidža

napravila je značajan iskorak kada je riječ o iznosu Budžeta. U odnosu na 2023. godinu on je veći za više od 15 miliona KM, dok je u poređenju s Budžetom iz 2020. rastao za više od 100%.

U Budžetu Općine Ilidža za 2024. godinu zadržane su sve stavke koje se odnose na socijalnu zaštitu, podršku boračkoj populaciji, podršku iz oblasti sporta, kulture, obrazovanja i mladih, kao i druge, a više od 60% sredstava u Budžetu Općine Ilidža namijenjeno je za realizaciju kapitalnih projekata. Najveći kapitalni projekti u ovoj kalendarskoj godini svakako su izgradnja osnovne škole na Stupu, izgradnja sportske dvorane u Hrasnici, kao i rekonstrukcija vrtića Lužani.

Vijećnice i vijećnici Općinskog vijeća usvojili su i Odluku o imenovanju investicionog menadžera Općine Ilidža za 2024. godinu. OV Ilidža dalo je saglasnost na Program rada JP Ilidža za poslovnu 2024., a usvojena je i Odluka o stipendiranju učenika u srednjem i studenata u visokoškolskom obrazovanju koji su ostvarili uspjeh u prethodnoj školskoj/akademskoj godini, a imaju određen iznos prihoda po članu zajedničkog domaćinstva u školskoj/akademskoj 2023/2024.

Usvojena je i Odluka o raspisivanju Javnog poziva za predlaganje kandidata za dodjelu priznanja Općine Ilidža.

Prema podacima Turističke zajednice Kantona Sarajevo za period od 1. januara do 1. oktobra 2023. godine

NA ILIDŽI OSTVARENO 560.000 NOĆENJA

Općina Ilidža je i u 2023. godini bila u samom vrhu liste kada je riječ o broju dolazaka i ostvarenih noćenja turista.

Od početka godine do 1. oktobra 2023. zabilježeno je više od 560.000 noćenja na području naše lokalne zajednice. Prema podacima Turističke zajednice Kantona Sarajevo Ilidžu je 2023. godine posjetilo 242.619 turista, 2022. godine 187.605, dok je 2021. imala 111.597 turista.

Zahvaljujući pravovremenom planiranju infrastrukturnih ulaganja za 2023. godinu, kao i osiguravanju budžetskih sredstava, Ilidža je pretvorena u mjesto s potrebnom

infrastrukturnom i bogatim sadržajem.

Zapuštene površine pretvorene su u prostor za djecu, odmor i sportske aktivnosti.

U samom centru Ilidže jedan od najljepših parkova, instalirana je moderna rasvjeta te su uređene pješačke staze.

Centralni ilidžanski trg transformisan dobio je napokon izgled kakav zaslužuje, a pretvoren je u prostor funkcionalan za boravak ljudi ali i mjesto pogodno za održavanje velikih sportskih i kulturno-zabavnih manifestacija.

Učenici osnovnih i srednjih škola, studenti, sportisti i klubovi nagrađeni za uspjehe i ostvarene rezultate

OPĆINA ILIDŽA NAGRADILA ONE NAJBOLJE



Nagrađeni učenici osnovnih i srednjih škola

Na kraju kalendarske godine Općina Ilidža ugostila je učenike osnovnih i srednjih škola koji su ostvarili zavidne rezultate.

Za rezultate na općinskim takmičenjima uručeno je 112 diploma, a 49 učenika dobilo je novčane nagrade. Diplome su uručene i za osam osnovnih škola, kao i za 36 nastavnika. Za osvojeno jedno od prvih tri mjesta na kantonalnom, federalnom, državnom ili međunarodnom nagrađeno je ukupno 59 učenika.

Ni najbolji studenti nisu ostali uskraćeni za svoje nagrade. Zlatnim značkama Univerziteta u Sarajevu dodijeljeno je po 1.500 KM, a Srebrnim po 1.100 KM.

Nagrađeni su i ilidžanski sportisti i klubovi koji su u 2023. godini ostvarili zapažene rezultate.



Prije 80 godina obnovljena državnost i proklamovano jedinstvo svih naroda

OBILJEŽEN DAN DRŽAVNOSTI BIH, UVELIČALA GA DJECA IZ VRTIĆA RADOST



Jedan od najznačajnijih datuma u historiji Bosne i Hercegovine



Povodom 25. novembra, Dana državnosti Bosne i Hercegovine, podsjećanjem na hiljadugodišnje postojanje naše domovine, na njenu historiju, njene vrijednosti, održana je Svečana sjednica Općinskog vijeća Ilidža pod predsjedavanjem Tarika Stambolića.

U obraćanju brojnim zvanicama načelnik Općine Ilidža Nermin Muzur govorio je o historijskom značaju Prvog zasjedanja Zemaljskog antifašističkog vijeća narodnog oslobođenja BiH.

- Prije 80 godina obnovljena je državnost i proklamovano je jedinstvo svih naroda. To su ideali kojim, kao nikad prije, treba težiti. Na Ilidži dobro znamo kako je bilo tokom agresije braniti ono što je definisano 1943. godine. Neki su dali najbolje godine života da bi se mi mogli okupiti i obilježiti godišnjicu jednog od najznačajnijih datuma u historiji BiH - kazao je načelnik Muzur.

U sklopu obilježavanja Dana državnosti BiH delegacija Općine

Ilidža predvođena načelnikom Nerminom Muzurom, predsjedavajućim OV Ilidža Tarikom Stambolićem i njegovim zamjenicima Selverom Zečirovićem i Amarom Bungurom, odala je počast šehidima i poginulim borcima polaganjem cvijeća na Centralnom spomen-obilježju Ilidža i na Spomen kosturnici borcima NOR-a na Ilidži. Pored delegacije Općine obilježavanju jednog od najvažnijih datuma naše domovine prisustvovali su i građani Ilidže, članovi boračkih udruženja i političkih partija.

Obilježavanje Dana državnosti Bosne i Hercegovine uveličali su i polaznici vrtića Radost sa svojim učiteljicama, učiteljima i odgajateljima koji su u Multifunkcionalnu salu unijeli baš ono što predstavlja ime njihovog vrtića.

Djevojčice i dječaci zahvalnicom i kolačima zahvalili su se načelniku Muzuru, a potom su i sami iznenađeni prigodnim zabavnim programom koji je priređen samo za njih.

Na inicijativu načelnika Nermina Muzura Općina Ilidža odlučila izdvojiti sredstva za novogodišnje poklone

PAKETIĆIMA OBRADOVALI DJECU SREBRENICE

Posljednjeg dana u 2023. godini načelnik Općine Ilidža, Nermin Muzur, posjetio je Srebrenicu, gdje je prisustvovao dodjeli paketića za tamošnju djecu, a koje je osigurala Općina Ilidža.

- Ljubav i pažnju odlučili smo pokloniti onima koje u srcu nosimo 365 dana. Djeca Srebrenice snažno vole, raduju se i nesebično dijele emociju. Njihovi pogledi, sreća i radost čine najsajniji završetak, za nas, jako izazovne 2023. godine - rekao je načelnik Općine Ilidža Nermin Muzur.

Pored činjenice da je finansijska pomoć radu Memorijalnog centra Srebrenica - Potočari stalna stavka u Budžetu Općine Ilidža, kao i da učenici svih ilidžanskih osnovnih škola redovno posjećuju Potočare, na inicijativu načelnika Muzura, izdvojena su sredstva za kupovinu paketića za srebreničku djecu.



Uspješna godina okončana podjelom paketića u Srebrenici




**Osnovna škola
Stup**



**Tramvajska pruga
Ilidža - Hrasnica**



**Sportska dvorana
Hrasnica**



**Veliki
park**




**Termalni
bazeni**



**Sportsko-rekreativni
centar "Čarli"**




**Trg
"Sabit Hadžić"**



**Kružni tok
"Idu dani"**



**Uređenje centralnog
dijela Ilidže**



**Ratni put
preko Igmana**



**Rekonstrukcija
Stojčevca**



**Obnova
premjera**